


9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

C40-4514



B 64853

天台摩訶止觀序

唐翰林學士守右補闕安定梁肅述

夫止觀何爲也導萬法之理而復於實際者也實際者何也性之本也物之所以不能復者昏與動使之然也照昏者謂之明駐動者謂之靜明與靜止觀之體也在因謂之止觀在果謂之智定因謂之行果謂之成行者行此者也成者證此者也原夫聖人有以見惑足以喪志動足以失方於是乎止而觀之靜而明之使其動而能靜靜而能明因相待以成法卽絕待以照本立大車以御正乘大事而總權消息乎不

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

二之場鼓舞於說三之城至微以盡性至牘以體神語其近則一毫之善可通也語其遠則重玄之門可闕也用至圓以圓之物無偏也用至實以實之物無妄也聖人舉其言所以示也廣其用所以告也優而柔之使自求之擬而議之使自至之此止觀所由作也夫三諦者何也一之謂也空假中者何也一之目也空假者相對之義中道者得一之名此思議之說非至一之旨也至一卽三至三卽一非相舍而然也非相生而然也非數義也非強名也自然之理也而言而傳之者迹也理謂之本迹謂之末本也者聖人所

至之地也末也者聖人所示之教也由本以垂迹則爲小爲大爲通爲別爲頓爲漸爲顯爲秘爲權爲實爲定爲不定循迹以返本則爲一爲大爲圓爲實爲無住爲中爲妙爲第一義是三之一之蘊也所謂空也者通萬法而爲言者也假也者立萬法而爲言者也中也者妙萬法而爲言者也破一切惑莫盛乎空建一切法莫盛乎假究竟一切性莫大乎中舉中則無法非中目假則何法非假舉空則無法不空成之謂之三德修之謂之三觀舉其要則聖人極深研幾窮理盡性之說乎昧者使明塞者使通通則悟悟則至

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

至則常常則盡矣明則照照則化化則成成則一矣
聖人有以彌綸萬法而不差旁礴萬劫而不遺燾載
恒沙而不有復歸無物而不無寓名之曰佛強號之
曰覺究其旨其解脫自在莫大極妙之德乎夫三觀
成功者如此所謂圓頓者非漸次非不定指論十章
之義也十章者恢演始末通道之關也五略者舉其
宏綱截流之津也十境者發動之機立觀之諦也十
乘者妙用所修發行之門也止於正觀而終於見境
者義備故也闕其餘者非修之要也乘者何也載物
而運者也十者何也成載之事者也知其境之妙不

行而至者德之上也乘一而已矣豈藉夫九哉九者
非他相生之說未至者之所踐也故發心者發無所
發安心者安無所安徧破者徧無所徧爰至餘乘皆
不得已而說也至於別其義例判爲章目推而廣之
不爲繁統而簡之不爲少如連環不可解也如貫珠
不可雜也如懸鏡不可掩也如通川不可遏也義家
多門非詮論也按經證義非虛說也辯四教淺深事
有源也大事因緣理無遺也噫止觀其救世明道之
書乎非夫聖智超絕卓爾獨立其孰能爲乎非夫聰
明深達得意忘象其孰能知乎今之人乃專用章句

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

文字從而釋之又何疎漏耶或稱不思議境與不思議事皆極聖之城等覺至人猶所未盡若凡夫生滅心行三惑浩然於言說之中推上妙之理是猶醯雞渝說大鵬夏蟲之議層冰其不可見明矣今止觀之說文字萬數廣論果地無益初學豈如闇然自修功至自至何必以早計爲事乎是大不然凡所爲上聖之域豈隔濶遼夐與凡境杳絕歟是唯一性而已得之爲悟失之爲迷一理而已迷而爲凡悟而爲聖迷者自隔理不隔也失者自失性不失也止觀之作所以離異同而究聖神使群生正性而順理者也正性

順理所以行覺路而至妙境也不知此教者則學有所入功何所施智何所發譬如無目昧於日月之光行於重險之處顛踣墮落可勝既乎噫去聖久遠賢人不出庸昏之徒含識而已致使魔邪詭惑諸黨竝熾空有云云爲坑爲堦有膠於文句不敢動者有流於莽浪不能住者有太遠甘心而不至者有太近而我身卽是者有枯木而稱定者有竅號而稱慧者有奔走非道而言權者有假於鬼而言通者有放心而言廣者有罕言而爲密者有齒舌潛傳爲口訣者凡此之類自立爲祖繼祖爲家反經非聖昧者不覺仲

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

尼有言道之不明也我知之矣由物累也悲夫隋開
 皇十八年智者大師去世至皇朝建中垂二百載以
 斯文相傳凡五家師其始曰灌頂其次曰縉雲威又
 其次曰東陽小威又其次曰左溪朗公其五曰荆溪
 然公頂於同門中慧解第一能奉師訓集成此書蓋
 不以文辭爲本故也或失則煩或得則野當二威之
 濶緘授而已其道不行天寶中左溪始弘解說而知
 者益寡荆溪廣以傳記數十萬言網羅遺法勤矣備
 矣荆溪滅後知其說者適三四人古人云生而知之
 者上學而知之者次因而學之又其次夫生而知之

者益性德者也學而知之者天機深者也若嗜慾深
 耳目塞雖學而不知斯爲下矣今夫學者內病於蔽
 外役於煩沒世不能通其文數年不能得其益則業
 文爲之屢校楷足也棼句爲之簸糠眯目也以喻之不能
 師教不領之弟子止觀所以未光大於時也予常戚
 戚於是整其宏綱撮其機要其理之所存教之所急
 或易置之或引伸之其義之迂其辭之鄙或薙除之
 或潤色之大凡浮疎之患十愈其九廣略之宜三存
 其一是祛鄙滯導蒙童貽諸他人則吾豈敢若同見
 同行且不以止觀罪我亦無隱乎爾建中上元甲子

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

首事筆削二歲在折木之津功畢云爾

廣言上卷

智者大師傳論 天台法門議
安定 小 肅 述

論曰修釋氏之訓者務三而已曰戒定慧斯道也始
於發心成於妙覺經緯於三乘導達於萬行而能事
備焉昔法王出世由一道清淨用一音演說機感不
同所聞蓋異故五時五味半滿權實偏圓小大之義
播於諸部粲然殊流要其所歸無越一實故經曰雖
說種種道其實爲佛乘又曰開方便門示真實相喻
之以衆流入海標之以不二法門自他兩得同詣秘密
此教之所由作也暨鶴林滅而法網散神足隱而

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

宗塗異各權所據示盾更作其中或三昧示生四依
出現應機不等持論亦別故攝論地持成實唯識之
類分路竝作非有非空之談莫能一貫既而去聖滋
遠其風益扇說法者桎梏於文字莫知自解習禪者
虛無其性相不可牽復是此者非彼未證者謂證慧
解之道流以妄返身口之事蕩而無章於是法門之
大統或幾乎息矣既而敎不終充至人利見慧文慧
思或躍相繼法雷之震未普故木鐸重授於天台大
師大師象身子善現之超悟備帝堯大舜之體相贊
龍樹之遺論從南嶽之妙解然後用三種止觀成一

事因緣括萬法於一心開十乘於八教戒定慧之說
空假中之觀坦然明白可舉而行於是敎無遺法法
無棄人人無廢心心無擇行行有所證證有其宗大
師敎門所以爲盛故其在世也光昭天下爲帝王師
範其去世也往來上界爲慈氏輔佐卷舒於普門示
現降德爲如來所使階位境智益無得而稱焉於戲
應迹雖徃微言不墜習之者猶足以抗折百家昭示
三藏又況聞而能思思而能修修而能進進而不已
者歟斯人也雖曰未證吾必謂之近矣今之人正信
者鮮啓禪關者或以無佛無法何罪何善之化之

中人以下馳騁愛欲之徒出入衣冠之類以爲斯言至矣且不逆耳私欲不廢故從其門者若飛蛾之赴明燭破塊之落空谷殊不知坐致焦爛而莫能自出雖欲益之而實損之與夫衆魔外道爲害一揆由是觀之此宗之大訓此教之旁濟其於天下爲不侔矣自智者傳法五世至今湛然大師中興其道爲予言之如此故錄之以繫于篇

重刻摩訶止觀序

夫摩訶止觀者吾祖智者大師以五畧十廣垂示自行因果化他能所之妙典也止以止散卽散而寂觀以觀昏卽昏而朗繫緣法界一念法界蓋未有離是而明靜可復其原亦未有離是而定慧可究其極故章安指爲諸佛之師以法常諸佛亦常以法樂我淨諸佛亦樂我淨誠哉一一皆空皆假皆中一一惟大惟多惟勝矣然大師始得之南嶽一曰圓頓是解頓而行頓者一曰漸次是解頓而行漸者一曰不定是解頓而行或頓或漸者乃直依圓頓以觀一念陰心

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

全體一界十界百界全體十如百如千如境從此立觀從此起境不思議觀不思議此靈嶽所以親承大蘇所以妙悟獲旋總持有自來矣及縱無礙辯稱實敷宣結之而爲三千絕待境觀則說已心中所行觀道於是爲大備若轉而上之南嶽得之北齊北齊得之龍樹龍樹又展轉而得之釋迦釋迦原始要終闡其旨於法華所謂一經開顯十方三世無異途者荆谿嘗云止觀以法華爲宗骨又云今文卽是法華顯實妙觀四明亦云止觀一部卽法華三昧之筌蹄一乘十觀卽法華三昧之正體謂非諸祖之止觀正釋

迦所以爲止爲觀而釋迦之止觀皆諸佛所以爲止爲觀耶今獨曰天台止觀者良以佛法東漸凡著述流行於當代者盈耳衣鉢傳受於禪門者溢目靡不一途偏顯兼之者寡若如今部之括一代教門攬法華車體十境十乘絕思絕議義與觀雙明定與慧咸美直指人心見性成佛不以空言自誣而直爲前代所未見未聞則舍吾祖智者其無從舍摩訶止觀亦無從矣故言止觀必歸之智者而曰天台非無謂也其原本從章安再治文凡十卷及載入大藏卽其卷而上下之成二十卷禾中漏澤向有方冊之刻不謂也

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

乙酉夏復爲兵火所燹噫斯文若墜將來可悲實切
余心乃白法師情存樂法續刻之楞嚴以繼流布而
屬余序之爰念此之止觀自百松嗣興幽谿繼響余
復從桐谿尊者授受有年茲正演說於鹽官之戒壇
而白法師適有斯舉道之將行誠不孤運矣今而後
唯薄海内外家藏是典使向之以文字稱師者習學
乎此必當附文而成觀使向之以闇證爲禪者見聞
乎此亦復卽陰以觀心又何認魚目爲明珠指山雞
爲鸞鳳不失之淺卽失之僞耶則救世明道更不可
不急行於今日者敬略紀其重刻緣起若是

時

丙戌陽月旣望傳天台教觀達孫受汰稽首和南書
于浙濱之古戒壇



9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

摩訶止觀 卷第一



摩訶止觀卷第一

摩訶止觀卷第一 上

隋天台智者大師說

門人灌頂記

止觀明靜前代未聞智者大隋開皇十四年四月二十六日於荊州玉泉寺一夏敷揚一時慈雲雖樂說不窮纔至見境法輪停轉後分弗宣然挹流尋源聞香討根論曰我行無師保經云受荊於定光晝言生知者上學而次良法門浩妙爲天真獨朗爲從藍而青行人若聞付法藏則識宗元大覺世尊積劫行滿涉六年以伏見舉一指而降魔始鹿苑中鷲頭後鶴

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

林法付大迦葉迦葉八分舍利結集三藏法付阿難
 阿難河中入風三昧四派其身法付商那和修修手
 雨甘露現五百法門法付瓊多多在俗得三果受戒
 得四果法付提迦多多登壇得初果三羯磨得四果
 法付彌遮迦迦付佛駄難提提付佛駄蜜多多授王
 三歸降伏算者法付脇比丘比丘出胎髮白手放光
 取經法付富邢奢奢論勝馬鳴剃髮爲弟子鳴造賴
 吒和羅妓妓音演無常苦空聞者悟道法付毗羅羅
 造無我論論所向處邪見消滅法付龍樹樹生生身
 龍成法身法付提婆婆鑒天眼施萬肉眼法付羅睺

羅羅識鬼名書降伏外道法付僧怯難提提說偈試
 羅漢法付僧怯耶奢奢遊海見城說偈法付鳩摩羅
 駄駄見萬騎記馬色得人名分別衣法付闍夜邢邢
 爲犯重人作火坑令人懺悔坑成池罪滅法付盤駄
 駄付摩奴羅羅分恒河爲二分自化一分法付鶴勒
 夜邢邢付師子師子爲檀彌羅王所害劙斬流乳付
 法藏人始迦葉終師子二十三人末田地與商那同
 時取之則二十四人諸師皆金口所記並是聖人能
 多利益昔王不立廄於寺立廄於屠況好世值聖寧
 無益耶又婆羅門貨髑髏孔達者半者不者達者起

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

塔禮供得生天聞法之要功德若此佛爲此益付法藏也此之止觀天台智者說已心中所行法門智者生光滿室目現雙瞳行法華經懾發陀羅尼代受法師講金字般若陳隋二國宗爲帝師安禪而化位居五品故經云施四百萬億那由他國人一一皆與七寶又化令得六通不如初隨喜人百千萬倍況五品耶文云卽如來使如來所使行如來事大經云是初依菩薩智者師事南岳南岳德行不可思議十年專誦七載方等九旬常坐一時圓證大小法門朗然洞發南岳事慧文禪師當齊高之世獨步河淮法門非

世所知履地戴天莫知高厚文師用心一依釋論論是龍樹所說付法藏中第十三師智者觀心論云歸命龍樹驗知龍樹是高祖師也疑者云中論遺蕩止觀建立云何得同然天竺注論凡七十家不應是青目而非諸師又論云因緣所生法我說卽是空亦爲是假名亦是中道義云天台傳南岳三種止觀一漸次二不定三圓頓皆是大乘俱緣實相同名止觀漸則初淺後深如彼梯陞不定前後更互如金剛寶置之日中圓頓初後不二如通者騰空爲三根性說三法門引三譬喻略說竟更廣說漸初亦知實相實

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

相難解漸次易行先修歸戒翻邪向正止火血刀達
 三善道次修禪定止欲散網達色無色定道次修無
 漏止三界獄達涅槃道次修慈悲止於自證達菩薩
 道後修實相止一邊偏達常住道是爲初淺後深漸
 次止觀相不定者無別階位約前漸後頓更前更後
 互淺互深或事或理或指世界爲第一義或指第一
 義爲人對治或息觀爲止或照止爲觀故名不定
 止觀疑者云教境名同相頓爾異然同而不同不同
 而同漸次中六善惡各三無漏總中三凡十二不同
 從多爲言故名不定此章同大乘同實相同名止觀

何故名爲辯差然同而不同不同而同漸次中九不
 同不定中四不同總有十三不同從多爲言故名不
 同耳一切聖人皆以無爲法而有差別卽其義也圓
 艋者初緣實相造境卽中無不真實繫緣法界一念
 法界一色一香無非中道已界及佛界衆生界亦然
 陰入皆如無苦可捨無明塵勞卽是菩提無集可斷
 邊邪皆中正無道可修生死卽涅槃無滅可證無苦
 無集故無世間無道無滅故無出世間純一實相實
 相外更無別法法性寂然名止寂而常照名觀雖言
 初後無二無別是名圓頓止觀漸與不定置而不論

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

今依經更明圓頓如了達甚深妙德賢首曰菩薩於生死最初發心時一向求菩提堅固不可動彼一念功德深廣無崖際如來分別說窮劫不能盡此菩薩聞圓法起圓信立圓行住圓位以圓功德而自莊嚴以圓力用建立衆生云何聞圓法聞生死卽法身煩惱卽般若結業卽解脫雖有三名而無三體雖是一體而立三名是三卽一相其實無有異法身究竟般若解脫亦究竟般若清淨餘亦清淨解脫自在餘亦自在聞一切法亦如是皆具佛法無所減少是名聞圓法云何圓信信一切法卽空卽假卽中無一二三

而一二三無一二三是遮一二三而一二三是照一二三無遮無照皆究竟清淨自在聞深不怖聞廣不疑聞非深非廣意而有勇是名圓信云何圓行一向專求無上菩提卽邊而中不餘趣向三諦圓修不爲無邊所寂有邊所動不動不寂直入中道是名圓行云何入圓位入初住時一住一切住一切究竟一切清淨一切自在是名圓位云何圓自在莊嚴彼經廣說自在相或於此根入正受或於彼根起出說或於一根雙入出或於一根不入出餘一根亦如是或於此塵入正受或於彼塵起出說或於一塵雙入出

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

或於一塵不入出餘一一塵亦如是或於此方入正受或於彼方起出說或於一方雙入出或於一方不入出或於一物入正受或於一物起出說或於一物雙入出或於一物不入出若委說者祇於一根一塵卽入卽出卽雙入出卽不入出於正報中一一自在於依報中亦如是是名圓自在莊嚴譬如日光周四天下一方中一方旦一方夕一方夜半輪迴不同祇是一日而四處見異菩薩自在亦如是云何圓建立衆生或放一光能令衆生得卽空卽假卽中益得入出雙入出不入出益歷行住坐卧語默作作亦如是

有緣者見如日覩光無緣不覺盲瞽常闇故舉龍王爲譬豎徧六天橫亘四域興種種雲震種種雷耀種種電降種種雨龍於本宮不動不搖而於一切施設不同菩薩亦如是內自通達卽空卽假卽中不動法性而令獲種種益得種種用是名圓力用建立衆生初心尚爾況中後心如來殷勤稱歎此法聞者歡喜常啼東請善財南求藥王燒手普明刎頭一日三捨恒河沙身尚不能報一句之力況兩肩荷負百千萬劫寧報佛法之恩一經一說如此餘經亦然疑者云餘三昧願聞誠證然經論浩博不可委引略舉一兩

9 10 1 2 3 4 5 6 7 8 9 30 1 2 3 4 5 6 7 8 9 30 1

淨名云始坐佛樹力降魔得甘露滅覺道成三轉法輪於大千其輪本來常清淨天人得道此爲證三寶於是現世間此卽漸教之始也又云佛以一音演說法衆生隨類各得解或有恐怖或歡喜或生厭離或斷疑斯則神力不共法此證不定教也又云說法不有亦不無以因緣故諸法生無我無造無受者善惡之業不敗亡此證頓教也大品云次第行次第學次第道此證漸也又云以衆色裹摩尼珠置之水中隨物變色此證不定也又云從初發心卽坐道場轉法輪度衆生此證頓也法華云如是之人應以此法漸

入佛慧此證漸也又云若不信此法於餘深法中示教利喜此證不定也又云正直捨方便但說無上道此證頓也大經云從牛出乳乃至醍醐此證漸也又云置毒乳中乳卽殺人乃至置毒醍醐醍醐殺人此證不定也又云雪山有草名曰忍辱牛若食者卽得醍醐此證頓也無量義云佛轉法輪微沛先墮淹諸欲塵閻涅槃門扇解脫風除世熱惱致法清涼次降十二因緣雨灑無明地掩邪見光後澍無上大乘普令一切發菩提心此證漸也華嚴曰娑伽羅龍車軸雨海餘地不堪爲上根性說圓滿修多羅二乘如聲

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

如痘淨名曰入瞻葛林不覩餘香入此室者但聞諸佛功德之香首楞嚴曰擣萬種香爲丸若燒一塵具足衆氣大品曰以一切種智知一切法當學般若波羅蜜法華曰合掌以敬心欲聞具足道大經曰譬如有人在大海浴當知是人已用諸河之水華嚴曰譬如日出先照高山次照幽谷次照平地平地不定也幽谷漸也高山頓也上來皆是金口誠言三世如來所尊重法過去過去久遠久遠邈無萌始現在現在無邊無際未來未來展轉不窮若已今當不可思議當知止觀諸佛之師以法常故諸佛亦常樂我淨等

亦復如是如是引證寧不信乎旣信其法須知三文次第禪門合三十卷今之十軸是大莊嚴寺法慎私記不定文者如六妙門以不定意歷十二禪九想八背觀練熏修因緣六度無礙旋轉縱橫自在是陳尚書令毛喜請智者出此文也圓頓文者如灌頂荊州玉泉寺所記十卷是也雖有三文無得執文而自疣害論云若見若不見般若皆縛皆脫文亦例然疑者云諸法寂滅相不可以言宣大經云生生不可說乃至不生不生不可說若通若別言語道斷無能說無所說身于云吾聞解脫之中無有言說故吾於此

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

不知所云淨名云其所說者無說無示其聽法者無聞無得斯人不能說斯法不可說而言示人然但引一邊不見其二大經云有因緣故亦可得說法華云無數方便種種因緣爲衆生說又云以方便力故爲五比丘說若通若別皆可得說大經云有眼者爲盲人說乳此指真諦可說天王般若云總持無文字文字顯總持此指俗諦可說又如來常依二諦說法淨名云文字性離卽是解脫卽說是無說大經云若知如來常不說法是卽多聞此指不說而是說也思益云佛及弟子常行二事若說若默法華云去來坐立

常宣妙法如注大雨又云若欲求佛道常隨多聞人善知識者是大因緣所謂化導今得見佛大經云空中雲雷生象牙上華何時一向無說若競說默不解教意去理逾遠離說無理離理無說卽說無說無說卽說無二無別卽事而真大悲憐愍一切無聞如月隱重山舉扇類之風息太虛動樹訓之今人意鈍玄覽則難眼低色入假文則易若封文爲害須知文非文達一切文非文非不文能於一文得一切解爲此義故以三種文作達一門也已略說緣起竟○今當開章爲十一大意二釋名三體相四攝法五偏圓六

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣記卷之二

九

方便七正觀八果報九起教十旨歸十是數方不多
 不少始則標期在茶終則歸宗至極善始令終總在
 十章中矣生起者專次第十章也至理寂滅無生無
 生者無起無起者有因緣故十章通是生起別論前
 章爲生次章爲起緣由趣次亦復如是所謂無量劫
 來癡惑所覆不知無明卽是明今開覺之故言大意
 旣知無明卽明不復流動故名爲止朗然大淨呼之
 爲觀旣聞名得體體卽攝法攝於偏圓以偏圓解起
 於方便方便旣立正觀卽成成正觀已獲妙果報從
 自得法起教教他自他俱安同歸常寂祇爲不達無

生無起是故生起旣了無生無起心行寂滅言語道
 斷寂然清淨分別者十章功德如囊中有寶不探示
 人人無見者今十章幾真幾俗幾非真非俗幾聖說
 聖默非說非默幾定幾慧幾目足幾非目足幾因果
 非因果非因果幾自他非自他幾共不共非共非不共
 幾通別非通別幾廣略非廣略幾橫豎非橫豎如是
 等種種應自在作問初八章卽俗而真果報一章卽
 真而俗旨歸章非真非俗正觀聖默餘八章聖說
 旨歸非說非默正觀一分是定餘八章及一分是慧
 旨歸非定非慧大意至正觀是因果報是果旨歸

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

非因非果前八章自行起教化他旨歸非自非他大意至起教是自方便至果報是足旨歸非自非足大意至正觀共果報起教不共旨歸非共非不共大意一通八章別旨歸非通非別大意略八章廣旨歸非廣非略體相豎餘八橫旨歸非橫非豎料簡者問略指大意同異云何答通則名異意同別則略指三門大意在一頓問約顯教論顯觀亦應約祕教論密觀答既分顯祕今但明顯不說祕問分門可爾任論得不答或得或不得教是上聖被下之言聖能顯祕兩說凡人宣述祇可傳顯不能傳祕聽者因何作觀或

得者六根淨位能以一妙竇徧滿三千界隨意悉能至則能傳祕教若修觀者發所修顯法不發不修者發宿習人得論密觀問初淺後深是漸觀初深後淺是何觀相答是不定觀問初後俱淺是何觀相答小乘意非三止觀相也問小乘亦是佛說何意言非若言非者不應言漸答既分大小小非所論今言漸者從微至著之漸耳小乘初後俱不知實相故非今漸也問示三文者文是色色是門爲非門若是門者色是實相更何所通若非門者云何而言一色一香皆是中道答文門並是實相衆生多顛倒少不顛倒以

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

文示之卽於文達文非文非文非不文文是其門於門得實相故文是其門門具一切法卽門卽非門非不門○解釋者釋十章也初釋大意囊括始終冠戴初後意緩難見今撮爲五謂發大心修大行感大果裂大網歸大處云何發大心衆生昏倒不自覺知勸令醒悟上求下化云何行大行雖復發心望路不動永無達期勸牢強精進行四種三昧云何感大果雖不求梵天梵天自應稱揚妙報慰悅其心云何裂大網種種經論開人眼目而執此疑彼是一非諸聞雪謂冷乃至聞鶴謂動今融通經論解結出籠

云何歸大處法無始終法無通塞若知法界法界無始終無通塞豁然大朗無礙自在生起五略顯於十廣云○就發心更爲三初方言次簡非後顯是菩提者天竺音也此方稱道質多者天竺音此方言心卽慮知之心也天竺又稱汙栗駛此方稱是草木之心也又稱矣栗駛此方是積聚精要者爲心也今簡非者簡積聚草木等心專在慮知心也道亦有通有別今亦簡之略爲十若其心念念專貪瞋癡攝之不還拔之不出日增月甚起上品十惡如五扇提羅者此發地獄心行火途道若其心念念欲多眷屬如海吞

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

流如火焚薪起中品十惡如調達誘衆者此發畜生
 心行血途道若其心念念欲得名聞四遠八方稱揚
 欽詠內無實德虛比賢聖起下品十惡如摩犍提者
 此發鬼心行刀途道若其心念念常欲勝彼不耐下
 人輕他珍已如鴟高飛下視而外揚仁義禮智信起
 下品善心行阿脩羅道若其心念念欣世間樂安其
 臭身悅其癡心此起中品善心行於人道若其心念
 念知三惡苦多人間苦樂相間天上純樂爲天上樂
 關六根不出六塵不入此上品善心行於天道若其
 心念念欲大威勢身口意纔有所作一切弭從此發

欲界主心行魔羅道若其心念念欲得利智辯聰高
 才勇哲鑒達六合十方顛顛此發世智心行尼犍道
 若六心念念五塵六欲外樂蓋微三禪樂如石泉其
 樂內重此發梵心行色無色道若其心念念知善惡
 輸環凡夫耽湎賢聖所呵破惡由淨慧淨慧由淨禪
 淨禪由淨戒尚此三法如飢如渴此發無漏心行二
 乘道若心若道其非甚多略言十耳或開上合下或
 開下合上令十數方足而已舉一種爲語端強者先
 率如論云破戒心墮地獄慳貪心墮餓鬼無慚愧心
 墮畜生卽其義也或先起非心或先起是心或是非

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

並起譬象魚風並濁池水象譬外魚譬內風譬並起
又象譬諸非自外而起魚譬內觀羸弱爲二邊所動
風譬內外合雜穢濁混和又九種是生死如蠶自縛
後一是涅槃如蠶獨跳雖得自脫未具佛法俱非故
雙簡前九是世間不動不出後一雖出無大悲俱非
雙簡也有爲無爲有漏無漏善惡染淨縛脫真俗等
種種法門亦如是又九法約世間苦諦後一非苦諦
雖非苦諦曲拙灰近故雙非簡卻次有爲有漏約集
諦後一非集諦雖非集諦曲近灰拙亦雙非簡也次
善惡染淨約道諦後一是道諦雖是道諦亦如前簡

名真說聽有三悉檀益名有邊第一義益名非有邊
非無邊故知緣起能辦大事則感應意也然四隨四
悉五緣名異意義則同今說之四隨是大悲應益悉
檀是憐愍偏施蓋左右之異耳言因緣者或因於聖
緣於凡或因於凡緣於聖則感應道交當知三法言
味相符則意同隨樂欲偏語修因所尚世界偏語受
報間隔蓋因果之異耳便宜者選法以擬人爲人者
觀人以逗法此乃欣赴不同耳又五因緣者衆生信
樂爲因佛說一法一切法大菩提心也於經是樂欲
於論是世界衆生有大精進勇猛佛說一行一切行

9 10 1 2 3 4 5 6 7 8 9 30 1 2 3 4 5 6 7 8

則四三昧於經是便宜於論是爲人衆生有平等大慧爲因感佛說一破一切破獲勝果報及通經論於經論俱是對治衆生有佛智眼爲因感佛說一究竟一切究竟得說旨歸寂滅於經論俱是第一義也又五緣五復次者菩提心是諸行本論舉種種行蓋枝本之異耳四三昧是通修念佛是別修蓋通別之異耳勝報備說依正習果報果跋致偏舉習果入位之相蓋雙隻之異耳除經論疑滯者經論是起疑執處拔弟子惡邪者是起過人人處與耳本末究竟等與第一義名同易見所以不異是爲義同又聖說多端

名真說聽有三悉檀益名有邊第一義益名非有邊非無邊故知緣起能辦大事則感應意也然四隨悉五緣名異意義則同今說之四隨是大悲應益悉檀是憐愍偏施蓋左右之異耳言因緣者或因於聖緣於凡或因於凡緣於聖則感應道交當知三法言味相符則意同隨樂欲偏語修因所尚世界偏語受報間隔蓋因果之異耳便宜者選法以擬人爲人者觀人以逗法此乃欣赴不同耳又五因緣者衆生信樂爲因佛說一法一切法大菩提心也於經是樂欲於論是世界衆生有大精進勇猛佛說一行一切行

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

則四三昧於經是便宜於論是爲人衆生有平等大慧爲因感佛說一破一切破獲勝果報及通經論於經論俱是對治衆生有佛智眼爲因感佛說一究竟一切究竟得說旨歸寂滅於經論俱是第一義也又五緣五復次者菩提心是諸行本論舉種種行蓋枝本之異耳四三昧是通修念佛是別修蓋通別之異耳勝報備說依正習果報果跋致偏舉習果入位之相蓋雙隻之異耳除經論疑滯者經論是起疑執處拔弟子惡邪者是起過人人處異耳本末究竟等與第一義名同易見所以不異是爲義同又聖說多端

或次說或不次說或具說或不具說或雜說或不雜說衆生稟益不同或次益不次益或具益不具益或雜益不雜益或四悉檀成五緣五緣成四悉或四悉成一因緣一因緣成一悉或一一因緣皆具四悉四悉具五緣如是等種種互相成顯還以三止觀結之可以意知又以一止觀結之發菩提心即是觀邪憚心息卽是止又五略祇是十廣初五章祇是發菩提心一意耳方便正觀祇是四三昧耳果報一章祇明違順違卽二邊果報順卽勝妙果報起敎一章轉其自心利益於他或作佛身施權實或作九界像對揚

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

漸頓轉漸頓弘通漸頓旨歸章祇是同歸大處祕密
藏中故知略廣意同也○顯是更爲三初四諦次四
弘後六卽四諦名相出大經聖行品謂生滅無生滅
無量無作生滅者苦集是世因果道滅出世因果苦
則三相遷移集則四心流動道則對治易奪滅則滅
有還無雖世出世皆是變異故名生滅四諦也無生
者苦無逼迫一切皆空豈有空能遣空卽色是空受
想行識亦復如是故無逼迫相也集無和合相者因
果俱空豈有因空與果空合歷一切貪瞋癡亦復如
是道不二相無能治所治空尚無一云何有二耶法

本不然今則無滅不然不滅故名無生四諦也無量
者分別校計苦有無量相謂一法界苦尚復若干況
十法界則種種若干非一乘若智若眼所能知見乃
是菩薩所能明了謂地獄種種若干差別鉢剝割截
燒煮剉切尚復若干不可稱計況復餘界種種色種
種受想行識塵沙海滯寧當可盡故非二乘知見菩
薩智眼乃能通達又集有無量相謂貪欲瞋癡種種
心種種身口集業若干身曲影斜聲喧響濁菩薩照
之不謬耳又道有無量相謂析體拙巧方便曲直長
短權實菩薩精明而不謬濫又滅有無量相如是方

9 10 1 2 3 4 5 6 7 8 9 30 1 2 3 4 5 6 7 8

便能滅見諦如是方便能滅思惟各有若干正助菩薩洞覽無毫差也又卽空方便正助若干皆無若干雖無若干而分別若干無謬無亂又如是方便能析滅四住又如是方便能體滅四住如是方便能滅塵沙如是方便能滅無明雖種種若干彼彼不雜又三悉檀分別故有若干第一義悉檀則無若干雖無若干從多爲論故名若干稱無量四諦也無作四諦者皆是實相不可思議非但第一義諦無復若干若三悉檀及一切法無復若干此義可知不復委記若以四諦豎對諸土有增有減同居有四方便則三實報

則二寂光但一若橫敵對者同居生滅方便無生滅實報無量寂光無作云又總說名四諦別說名十二因緣苦是識名色六入觸受生老死七支集是無明行愛取有等五支道是對治因緣方便滅是無明滅乃至老死滅故大經開四四諦亦開四十二因緣下智觀故得聲聞菩提中智觀故得緣覺菩提上智觀故得菩薩菩提上上智觀故得佛菩提又中論偈云因緣所生法卽是生滅我說卽是空是無生滅亦名爲假名是無量亦名中道義是無作又解因緣卽集所生卽苦滅苦方便是道苦集盡是滅又偈言因緣

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣說

因緣卽無明所生法卽行名色六入等故文云爲利根弟子說十二因緣不生不滅相指前二十五品爲鈍根弟子說十二因緣生滅相指後兩品當知論偈總說卽四種四諦別說卽四種十二因緣也已分別四四諦竟諸經明種種發菩提心或言推種種理發菩提心或覩佛種種相發菩提心或覩種種神通或聞種種法或遊種種土或覩種種衆或見修種種行或見種種法滅或見種種過或見他受種種苦而發菩提心略舉十種爲首廣說云推理發心者法性自天而然集不能染苦不能惱道不能通滅不能淨如

雲籠月不能妨害却煩惱已乃見法性經言滅非真諦因滅會真滅尚非真三諦焉是煩惱中無菩提苦提中無煩惱是名推生滅四諦上求佛道下化衆生發菩提心推無生四諦發心者法性不異苦集但迷苦集失法性如水結爲冰無別水也達苦集無苦集卽會法性苦集尚是何況道滅經言煩惱即是菩提菩提卽是煩惱是名推無生四諦上求下化發菩提心推無量者夫法性者名爲實相尚非一乘境界況復凡夫出二邊表別有淨法如佛藏經十喻云是名推無量四諦上求下化發菩提心推無作者夫法性

與一切法無二無別凡法尚是況二乘乎離凡法更求實相如避此空彼處求空卽凡法是實法不須捨凡向聖經言生死卽涅槃一色一香皆是中道是名推無作四諦上求下化發菩提心若推一法卽洞法界達邊到底究竟橫豎事理具足上求下化備在其中方稱發菩提心菩提名道道能通到橫豎彼岸名發心波羅蜜故於推理委作淺深事理周徧下去法例爾

摩訶止觀卷第一 上

晉書

校訛

第十一紙八行

若是南作苦是

第十五行

大綱南作天綱

第十三紙

音釋

廢居又切象馬舍也

墮丁鄧切登陟之道也

刎武粉切斷也

切乃伐忍也

鷄切鷄也

顚脂切鰐魚容切顚也

顚魚容切顚也

湎彌遠切溺也

切

騷蘇曹切騷擾憂煩也

逗音豆投也

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

摩訶止觀卷第一 下

隋天台智者大師說

門人灌頂記

觀佛相好發心者若見如來父母生身身相曷著明了得處輝麗灼爍毗首羯磨所不能作勝轉輪王相好纏絡世間希有天上天下無如佛十方世界亦無比願我得佛齊聖法王我度衆生無數無央是爲見應佛相好上求下化發菩提心若見如來知如來無如來若見相好知相好非相好如來及相皆如虛空空中無佛況復相好見如來非如來卽見如來見相

非相卽見諸相願我得佛齊聖法王我度衆生無數
無央是爲見勝應相好上求下化發菩提心若見如
來身相一切靡所不現如明淨鏡覩衆色像一一相
好凡聖不得其邊梵天不見其頂目連不窮其聲論
云無形第一體非莊嚴莊嚴願我得佛齊聖法王是
爲見報佛相好上求下化發菩提心若見如來知如
來智深達罪福相徧照於十方微妙淨法身具相三
十二一一相好卽是實相實相法界具足無減願我
得佛齊聖法王是爲見法佛相好上求下化發菩提
心云云何見佛種種神變發菩提心若見如來依根

本禪一心作一不得衆多若放一光從阿鼻獄上至
有頂火光晃耀天地洞明日月戢重輝天光隱不現
願我得佛齊聖法王云若見如來依如來無生理不
以二相應諸衆生能令衆生各各見佛獨在其前願
我得佛齊聖法王云若見如來依如來藏三昧正受
十方塵刹起四威儀而於法性未曾動搖願我得佛
齊聖法王云若見如來與諸神變無二無異如來作
神變神變作如來無記化化復作化不可窮盡皆
不可思議皆是實相而作佛事願我得佛齊聖法王
云何聞種種法發菩提心或從佛及善知識或從

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

經卷聞生滅一句卽解世出世法新新生滅念遷
 移戒慧解脫寂靜乃真願我得佛能說淨道云或聞
 生滅卽解四諦皆不生不滅空中無刺云何可拔誰
 苦誰集誰修誰證畢竟清淨能所寂然願我得佛能
 說淨道云或聞生滅卽解生滅對不生滅爲二非生
 滅非不生滅爲中中道清淨獨拔而出生死涅槃之
 表願我得佛能爲衆生說最上道獨拔而出如華出
 水如月處空云或聞生滅卽解生滅不生滅非生滅
 非不生滅雙照生滅不生滅卽一而三卽三而一法
 界祕密常樂具足願我得佛能爲衆生說祕密藏如

福德人執石成寶執毒成藥云若聞無生謂二乘無
 三界生菩薩未無生若聞無生謂三乘皆無三界生
 若聞無生二乘非分但在菩薩菩薩先無分段生次
 無變易生若聞無生一無生一切無生若聞無量一
 句例如此若聞無量謂二乘方便道四諦十六諦等
 以爲無量若聞無量二乘自用伏惑不能化他菩薩
 用此無量自去惑亦化他若聞無量謂二乘無分但
 在菩薩菩薩用斷界內塵沙亦伏界外塵沙若聞無
 量謂二乘無分但在菩薩菩薩用斷界內外塵沙亦
 伏無明若聞無量但在菩薩菩薩用伏斷無明若聞

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

無作一句例亦如此若聞無作謂非佛天人脩羅所作二乘證此無作思益云我等學於無作已作證得而菩薩不能證得云若聞無作謂三乘皆能證得若聞無作謂非二乘境界況復凡夫菩薩破權無作證實無作若聞無作謂卽權無作證實無作若得此意隨聞一句通達諸句乃至一切句一切法而無障礙

云夫一說衆解是義難明更約論偈重說之若言因緣所生法我說卽是空者旣言因緣所生那得卽空須析因緣盡方乃會空呼方空爲卽空亦名假名者

有爲虛弱勢不獨立假衆緣成賴緣故假非施權之

假亦名中道義者離斷常名中道非佛性中道若作如此解者雖二句皆空尚不成卽空況復卽假卽中此生滅四諦義也若因緣所生法不須破滅體卽是空而不得卽假卽中設作假中皆順入空何者諸法皆卽空無主我故假亦卽空假施設故中亦卽空離斷常二邊故此三番語雖異俱順入空退非二乘析法進非別非圓乃是三獸渡河共空之意耳若謂卽空卽假卽中者三種邇迤各有異三語皆空者無主故空虛設故空無邊故空三種皆假者同有名字故假三語皆中者中真中機中實故俱中此得別失

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

四

圓云若謂卽空卽假卽中者雖三而一雖一而三不相妨礙三種皆空者言思道斷故三種皆假者但有名字故三種皆中者卽是實相故但以空爲名卽具假中悟空卽悟假中餘亦如是當知聞於一法起種種解立種種願卽是種種發菩提心此亦可解其淨土徒衆修行法滅受苦起過等發菩提心例前可解不復委訖上來所說既多今以三種止觀結之然法性尚非一法云何以三四推之今言一二三四說法性是所迷苦集是能迷能迷有輕重所迷有卽離約界內外分別卽有四種苦集約根性取理卽有一二

三四不同云五若界內鈍人迷真重苦集亦重利人迷真輕苦集亦輕界外利鈍輕重亦如是法性是所解道滅是能解所解有卽離能解有巧拙界內鈍人所解離能解則拙利人所解卽能解亦巧界外利鈍卽離巧拙亦如是所以者何事理旣殊昏惑亦甚譬如父子兩謂路人瞋打俱重瞋以譬集打以譬苦若謂煩惱卽法性事理相卽苦集則輕實非骨肉兩謂父子瞋打則薄麤細枝本通別徧不徧難易等亦如是或云界內苦集底滯爲重界外升出爲輕或界內皮惑故爲淺界外肉惑故爲深或言界內隨他意故爲

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

序言

五

拙界外隨自意故爲巧或言界內稱機故爲巧界外不稱機故爲拙或言界內有能所故爲麤界外無能所故爲細或言界內小道極在化城故爲細界外大道極在寶所故爲麤或言界內容塵故爲枝界外同體故爲本或言界內在初故爲本界外在後故爲枝或言界內小大共故爲通界外獨在大故爲別或言界內偏故爲小淺故爲別界外圓故爲大無隔故爲通或言界內短故爲不偏界外周法界故爲偏或言界內在一切賢聖共故爲偏界外獨在大緣故爲不偏或言界內用二乘方便故爲難斷界外但依無礙

慧故爲易斷如是等種種互說今若結之則易可解若作淺深輕重者漸次觀意也若作一實四諦不分別者圓觀意也若作更互輕重者不定觀意也皆是大乘法相故須識之若見此意卽知三種漸次顯是不定顯是圓頓顯是云問集既有四苦果何二答惑隨於解集則有四解隨於惑但惑二死例如小乘惑隨於解則有見諦思惟若解隨於惑但是一分段生死耳問苦集可是因緣所生法道滅何故爾答苦集是所破道滅是能破能破從所破得名俱是因緣生法故大經云因滅無明則得熾然三菩提燈亦是因

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

緣也問法性是所迷何故二何故四答法性隨權實
是故二法性隨根緣是故四若見此意例見相聞法
乃至起過例作四種分別廣說云○中約弘誓顯是
者前推法性聞法等其義已顯爲未了者更約四弘
又四諦中多約解明上求下化四弘中多約願明上
求下化又四諦中通約三世佛明上求下化四弘中
多約未來佛明上求下化又四諦中多約諸根明上
求下化四弘中專約意根明上求下化如此分別令
易解得意者不俟也夫心不孤生必託緣起意根是
因法塵是緣所起之心是所生法此根塵能所三相

遷動竊起竊謝新新生滅念念不住眩爍如電耀逼
疾若奔流色泡受沫想炎行城識幻所有依報國土
田宅妻子財產一念喪失倏有忽無三界無常一篋
偏苦四山合來無逃避處唯當專心戒定智慧豎破
顛倒橫截死海超度有流經言我昔與汝等不見四
真諦是故久迴轉火宅如此云何耽湎縱逸嬉戲是
故慈悲起四弘誓拔苦與樂如釋迦之見耕墾似彌
勒之觀毀臺卽其義也以明了四諦故非九縛起四
弘誓故非一脫是爲非縛非脫發真正菩提心顯是
義明矣次祇觀根塵相對一念心起能生所生無不

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

卽空妄謂心起起無自性無他性無共性無無因性
 起時不從自他共離來去時不向東西南北去此心
 不在內外兩中間亦不常自有但有名字名之爲心
 是字不住亦不不住不可得故生卽無生亦無無生
 有無俱寂凡愚謂有智者知無如水中月得喜失憂
 大人去取都無欣慘鏡像幻化亦如是思益云苦無
 生集無和合道不二滅不生大經云解苦無苦而有
 真諦乃至解滅無滅而有真諦集旣卽空不應如彼
 渴鹿馳逐陽談苦旣卽空不應如彼癡猴捉水中月
 道旣卽空不應言我行卽空不行不卽空如筏喻者

法尚應捨何況非法滅旣卽空不應言衆生壽命誰
 於此滅而證彼滅生死旣空云何可捨涅槃旣空云
 何可得經言我不欲令無生法中有修道若四念處
 乃至八聖道我不欲令無生法中有得果若須陀洹
 乃至阿羅漢依例亦應言我不欲令無生法中有色
 受想行識我不欲令無生法中有貪欲瞋恚癡但愍
 念衆生興誓願拔兩苦與二樂以達苦集空故非九
 繩達道滅空故非一脫是爲非縛非脫發真正菩提
 心顯是義明矣祇觀根塵一念心起心起卽假假名
 之心爲迷解本謂四諦有無量相三界無別法唯是

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

一心作心如工畫師造種種色心構六道分別校記無量種別謂如是見愛是界內輕重集相界外輕重集相如是生死是分段輕重苦相界外輕重苦相還翻此心而生於解譬如畫師洗蕩諸色塗以堦彩所謂觀身不淨乃至觀心無常如是道品紓通化城觀身身空乃至觀心心空空中無無常乃至無不淨如是道品直通化城觀身無常無常卽空乃至觀身法性非常非無常非空非不空乃至觀心亦如是如是道品紓通寶所觀身法性非淨非不淨雙照淨不淨乃至觀心法性常無常雙照常無常如是道品直通

寶所是人見諦滅名須陀洹是人思惟滅名三果是人見滅名見地是人思滅名薄名離名已辦乃至侵習名辟支佛是人見思滅名十住塵沙滅名十行十迴向無明滅名十地等覺妙覺是人見思塵沙滅名十信無明滅名十住十行十迴向十地等覺妙覺分別十六門道滅不同及一切恒沙佛法分別校計不可說不可說如觀掌果無有僻謬皆從心生不餘處來觀此一心能通不可說心不可說心能通不可說法不可說法能通不可說非心非法觀一切心亦復如是九縛凡夫不覺不知如大富盲兒坐寶藏中都

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

無所見動轉堅凝爲寶所傷二乘熱病謂諸珍寶是鬼虎龍蛇棄捨馳走踰辨辛苦五十餘年雖縛脫之殊俱貧如來無上珍寶起大慈悲誓願拔苦與樂是爲非縛非脫發真正菩提心顯是義明矣次根塵相對一念心起卽空卽假卽中者若根若塵並是法界並是畢竟空並是如來藏並是中道云何卽空並從緣生緣生卽無主無主卽空云何卽假無主而生卽是假云何卽中不出法性並皆卽中當知一念卽空卽假卽中並畢竟空並如來藏並實相非三而三三而不三非合非散而合而散非非合非非散不可一

異而一異譬如明鏡明喻卽空像喻卽假鏡喻卽中不合不散合散宛然不一二三二三無妨此一念心不縱不橫不可思議非但已爾佛及衆生亦復如是華嚴云心佛及衆生是三無差別當知已心具一切佛法矣思益云愚於陰界入而欲求菩提陰界入卽是離是無菩提淨名曰如來解脫當於衆生心行中求衆生卽菩提不可復得衆生卽涅槃不可復滅一心既然諸心亦爾一切法亦爾普賢觀云毗盧遮那徧一切處卽其義也當知一切法卽佛法如來法界故若爾云何復言遊心法界如虛空又言無明明者

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

卽畢竟空此舉空爲言端空卽不空亦卽非空非不空又言一微塵中有大千經卷心中具一切佛法如地種如香丸者此舉有爲言端有卽不有亦卽非有非不有又言一色一香無非中道此舉中道爲言端卽中而邊卽非邊非不邊具足無減勿守語害圓誣罔聖意若得此解根塵一念心起根卽八萬四千法藏塵亦爾一念心起亦八萬四千法藏佛法界對法界起法界無非佛法生死卽涅槃是名苦諦一塵有三塵一心有三心一一塵有八萬四千塵勞門一心亦如是貪瞋癡亦卽菩提煩惱亦卽是菩提是

名集諦翻一塵勞門卽是八萬四千諸二昧門亦是八萬四千諸陀羅尼門亦是八萬四千諸對治門亦成八萬四千諸波羅蜜無明轉卽變爲明如融水成水更非遠物不餘處來但一念心普皆具足如如意珠非有寶非無寶若謂無者卽妄語若謂有者卽邪見不可以心知不可以言辯衆生於此不思議不縛法中而思想作縛於無脫法中而求於脫是故起大慈悲興四弘誓拔兩苦與兩樂故名非縛非脫發真正菩提心前三皆約四諦爲語今約法藏塵勞三昧波羅蜜其義宛然問前簡非併言非今顯是何故

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

併言是答所言併是者皆非縛非脫故言併是通皆上求故又次第漸入到實故言併是又實難知借權顯實故言併是此三番擬世界悉檀言併是也又權不攝實實則攝權欲令攝顯易見故言併是此一番擬爲人悉檀故言是也又一菩提心一切菩提心若不說者不知一切故言併是此一番擬對治悉檀明是若究竟而論前三是約權後一約實譬如良醫有一祕方總攝諸方阿伽陀藥功兼諸藥如食乳糜更無所須一切具足如意珠權實顯是其義可知又一是者一大事因緣故云何爲一一實不虛故一道

清淨故一切無礙人一道出生死故云何爲大其性廣博多所含容大智大斷大人所乘大師子吼大益凡聖故言爲大事者十方三世佛之儀式以此自成佛道以此化度衆生故名爲事因緣者衆生以此因感佛佛以此緣起應故言因緣又是者不可言三不可言一不可言非三非一而言三一故名不可思議是也又是者非作法非佛非天人脩羅所作常境無相常智無緣以無緣智緣無相境無相之境相無緣之智境冥一而言境智故名無作也又是者如文殊問經云破一切發名發菩提心常隨菩提相而發

菩提心又無發而發無隨而隨又過一切破過一切隨雙照破隨名發菩提心如此三種不一不異如理如事如非理非事故名爲是若例此義無作不可思議一大事因緣等諸法門皆言破皆言隨皆言非破非隨雙照破隨又前三是上中下智所觀後一是上上智所觀前三是共後一是不共前三淺近曲後一深遠直云前三是小中大後一是大中大上中上圓中圓滿中滿實中實真中真了義中了義玄中玄妙中妙不可思議中不可思議若能如此簡非顯是體權誠實而發心者是一切諸佛種譬如金剛從金性

生佛菩提心從大悲起是諸行先如服阿娑羅藥先用清水諸行中最如諸根中命根爲最佛正法正行中此心爲最如太子生具王儀相大臣恭敬有大聲名如迦陵頻伽鳥殼中鳴聲已勝諸鳥此菩提心有大勢力如師子筋弦如師子乳如金剛槌如那羅延箭具足衆寶能除貧苦如意珠雖小懈怠小失威儀猶勝二乘功德舉要言之此心卽具一切菩薩功德能成三世無上正覺若解此心任運達於止觀無發無礙卽是觀其性寂滅卽是止止觀卽菩提菩提卽止觀寶梁經云比丘不修比丘法大千無睡處況

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

受人供養六十比丘悲泣白佛我等乍死不能受人
供養佛言汝起慚愧心善哉善哉一比丘白佛何等
比丘能受供養佛言若在比丘數修僧業得僧利者
是人能受供養四果四向是僧數三十七品是僧業
四果是僧利比丘重白佛若發大乘心者復云何佛
言若發大乘心求一切智不墮數不修業不得利能
受供養比丘驚問云何是人能受供養佛言是人受
衣用數大地受搏食若須彌山亦能畢報施主之恩
當知小乘之極果不及大乘之初初又如來密藏經
說若人父爲緣覺而害盜三寶物母爲羅漢而汙不

實事訪佛兩舌間賢聖惡口罵聖人壞亂求法者五
逆初業之瞋奪持戒人物之貪邊見之癡是爲十惡
惡者若能知如來說因緣法無我人衆生壽命無生
無滅無染無著本性清淨又於一切法知本性清淨
解知信入者我不說是人趣向地獄及諸惡道果何
以故法無積聚法無集惱一切法不生不住因緣和
合而得生起起已還滅若心生已滅一切結使亦生
已滅如是解無犯處若有犯有住無有是處如百年
闇室若然燈時闇不可言我是室主住此久而不肯
去燈若生闇卽滅其義亦如是此經具指前四菩提

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣言山集卷一

四

心若知如來說因緣法卽指初菩提心若無生無滅指第二菩提心若本性清淨指第三菩提心若於一切法知本性清淨指第四菩提心初菩提心已能除重重十惡況第二第三第四菩提心初菩提心已能除妙功德當自慶幸如聞處伊蘭得光明栴檀問因緣語通何意初觀獨當其名答以最初當名耳又因緣事相初觀爲便若言生滅者卽別後三例有通別而從別受名耳○約六卽顯是者爲初心是後心是答如論焦炷非初不離初非後不離後若智信具足聞一念卽是信故不謗智故不懼初後皆是若無信高

推聖境非已智分若無智起增上慢謂已均佛初後俱非爲此事故須知六卽謂理卽名字卽觀行卽相似卽分真卽究竟卽此六卽者始凡終聖始凡故除疑惑終聖故除慢大云理卽者一念心卽如來藏理如故卽空藏故卽假理故卽中三智一心中具不可思議如上說三諦一諦非三非一一色一香一切法一切心亦復如是是名理卽是菩提心亦是理卽止觀卽寂名止卽照名觀名字卽者理雖卽是日用不知以未聞三諦全不識佛法如牛羊眼不解方隅或從知識或從經卷聞上所說一實菩提於名字中通

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

達解了知一切法皆是佛法是爲名字卽菩提亦是
名字止觀若未聞時處處馳求旣得聞已攀覓心息
名止但信法性不信其諸名爲觀觀行卽是者若但
聞名口說如蟲食木偶得成字是蟲不知是字非字
旣不通達寧是菩提必須心觀明了理慧相應所行
如所言所言如所行華首云言說多不行我不以言
說但心行菩提此心口相應是觀行菩提釋論四句
評聞慧具足如眼得日照了無僻觀行亦如是雖未
辨理觀心不息如首楞嚴中射的喻是名觀行菩提
亦名觀行止觀恒作此想名觀餘想息名止云相似

卽是菩提者以其逾觀逾明逾止逾寂如勤射鄰的
名相似觀慧一切世間治生產業不相違背所有思
想籌量皆是先佛經中所說如六根清淨中說圓伏
無明名止似中道慧名觀云分真卽者因相似觀力
入銅輪位初破無明見佛性開寶藏顯真如名發心
住乃至等覺無明微薄智慧轉著如從初日至十四
日月光垂圓闇垂盡若人應以佛身得度者卽入相
成道應以九法界身得度者以普門示現如經廣說
是名分真菩提亦名分真正觀分真智斷究竟卽菩
提者等覺一轉入于妙覺智光圓滿不復可增名苦

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣雅

卷三

提果大涅槃斷更無可斷名果果等覺不通唯佛能
通過茶無道可說故名究竟菩提亦名究竟止觀總
以譬譬之譬如貧人家有寶藏而無知者知識示之
卽得知也耘除草穢而掘出之漸漸得近近已藏開
盡取用之合六喻可解云問釋論五菩提意云何答
論豎判別位今豎判圓位會之發心對名字伏心對
觀行明心對相似出到對分真無上對究竟又用彼
名名圓位發心是十住伏心是十行問住已斷行云
何伏答此用真道伏例如小乘破見名斷思惟名伏
明心是十迴向出到是十地無上是妙覺又從十住

具五菩提乃至妙覺究竟五菩提故地義云從初一
地具諸地功德卽其義也問何意約圓說六卽客圓
觀諸法皆一至六卽故以圓意約一切法悉用六卽判
位餘不爾故不用之當其功用之胡爲不得而淺近
非教正意也然上來簡非先約苦諦升沉世間簡耳
次約四諦智曲拙淺近簡耳次約四弘行願次約六
卽位展轉深細方乃顯是故知明月神珠在九重淵
內驪龍領下有志有德方乃致之豈如世人麤淺浮
虛競執瓦石草木妄謂爲寶末學膚受太無所知
摩訶止觀卷第一下

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

校訛

第二紙二行

火光南
作大光

音釋

戢側入切遷也遷遯也遯遯也遯連接也池養里啖失舟切遄淳
 疾切構居候切合合也善音善白上也姈於卽丁切嫋嫋孤單貌貌搏徒官切聚尸感切領頸也

摩訶止觀卷第二

隋天台智者大師說

門人灌頂記

二勸進四種三昧入菩薩位說是止觀者夫欲登妙位非行不階善解鑽搖醍醐可獲法華云又見佛子修種種行以求佛道行法衆多略言其四一常坐二常行三半行半坐四非行非坐通稱三昧者調直定也大論云善心一處住不動是名三昧法界是一處正觀能住不動四行爲緣觀心藉緣調直故稱三昧也一常坐者出文殊說文殊問兩般若名爲一行三

昧今初明方法次明勸修方法者身論開遮口論說
默意論止觀身開常坐遮行住卧或可處衆獨則彌
善居一靜室或空閑地離諸喧鬧安一繩牀傍無餘
座九十日爲一期結跏正坐項脊端直不動不搖不
萎不倚以坐自誓肋不拄牀況復屍卧遊戲住立除
經行食便利隨一佛方面端坐正向時刻相續無須
更廢所開者專坐所遮者勿犯不欺佛不負心不詐
衆生口說默者若坐疲極或疾病所困或睡蓋所覆
內外障侵奪正念心不能遣卻當專稱一佛名字慚
愧懺悔以命自歸與稱十方佛名功德正等所以者

何如人憂喜鬱佛舉聲歌哭悲笑則暢行人亦爾風
觸七處成身業聲響出脣成口業二能助意成機感
佛俯降如人引重自力不前假傷救助則蒙輕舉行
人亦爾心弱不能排障稱名請護惡緣不能壞若於
法門未了當親近解般若者如聞修學能入一行三
昧面見諸佛上菩薩位誦經誦呪尚喧於靜況世俗
言語耶意止觀者端坐正念蠲除惡覺捨諸亂想莫
雜思惟不取相貌但專繫緣法界一念法界繫緣是
止一念是觀信一切法皆是佛法無前無後無復際
畔無知者無說者若無知無說則非有非無非知者

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

非不知者離此二邊住無所住如諸佛住安處寂滅法界聞此深法勿生驚怖此法界亦名菩提亦名不可思議境界亦名般若亦名不生不滅如是等一切法與法界無二無別聞無二無別勿生疑惑能如是觀者是觀如來十號觀如來時不謂如來爲如來無有如來爲如來亦無如來智能知如來者如來及如來智無二相無動相不作相不在方不離方非三世非不三世非二相非不二相非垢相非淨相此觀如來甚爲希有猶如虛空無有過失增長正念見佛相好如照水鏡自見其形初見一佛次見十方佛不用

神通往見佛唯住此處見諸佛聞佛說法得如實義爲一切衆生見如來而不取如來相化一切衆生向涅槃而不取涅槃相爲一切衆生發大莊嚴而不見莊嚴相無形無相無見聞知佛不證得是爲希有何以故佛卽法界若以法界證法界卽是諍論無證無得觀衆生相如諸佛相衆生界量如諸佛界量諸佛界量不可思議衆生界量亦不可思議衆生界住如虛空住以不住法以無相法住般若中不見凡法云何捨不見聖法云何取生死涅槃垢淨亦如是不捨不取但住實際如此觀衆生真佛法界觀貪欲嗔癡

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣言止觀卷三

三

諸煩惱恒是寂滅行是無動行非生死法非涅槃法
 不捨諸見不捨無爲而修佛道非修道非不修道是
 名正住煩惱法界也觀業重者無出五逆五逆即是
 菩提五逆無二相無覺者無知者無分別者逆
 罪相實相皆不可思議不可壞本無本性一切業
 緣皆住實際不來不去非因非果是爲觀業即是法
 界印法界印四魔所不能壞魔不得便何以故魔即
 法界印法界印云何毀法界印以此意歷一切法亦
 應可解上所說者皆是經文勸修者稱實功德獎於
 行者法界法是佛真法是菩薩印聞此法不驚不畏

乃從百千萬億佛所久植德本譬如長者失摩尼珠
 後還得之心甚歡喜四衆不聞此法心則苦惱若聞
 信解歡喜亦然當知此人卽是見佛已曾從文殊聞
 是法身子曰諦了此義是名菩薩摩訶薩彌勒云是
 人近佛座佛覺此法故故文殊云聞此法不驚卽是
 見佛佛言卽住不退地具六波羅蜜具一切佛法矣
 若人欲得一切佛法相好威儀說法音聲十力無畏
 者當行此一行三昧勤行不懈則能得入如治摩尼
 珠隨磨隨光證不可思議功德菩薩能知速得菩提
 比丘比丘尼聞不驚卽隨佛出家信士信女聞不驚

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

卽真歸依此之稱譽出彼兩經云○二常行三昧者
先方法次勸修方法者身開遮口說默意止觀此法
出般舟三昧經翻爲佛立佛立三義一佛威力二三
昧力三行者本功德力能於定中見十方現在佛在
其前立如明眼人清夜觀星見十方佛亦如是多故
名佛立三昧十住婆沙偈云是三昧住處少中多差
別如是種種相亦應須論議住處者或於初禪二三
四中間發是勢力能生三昧故名住處初禪少二禪
中三四多或少時住名少或見世界少或見佛少故
名少中多亦如是身開常行行此法時避惡知識及

癡人親屬鄉里常獨處止不得希望他人有所求索
常乞食不受別請嚴飾道場備諸供具香餚甘果盥
沐其身左右出入改換衣服唯專行旋九十日爲一
期須明師善內外律能開除妨障於所聞三昧處如
視世尊不嫌不恚不見短長當割肌肉供養師況復
餘耶承事師如僕奉大家若於師生惡求是三昧終
難得須外護如母養子須同行如共涉險須要期誓
願使我筋骨枯朽學是三昧不得終不休息起大信
無能壞者起大精進無能及者所入智無能逮者常
與善師從事終竟三月不得念世間想欲如彈指頃

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

五

三月終竟不得卧出如彈指頃終竟三月行不得休息除坐食左右爲人說經不得希望衣食婆沙偈云親近善知識精進無懈怠智慧甚堅牢信力無妄動口說默者九十日身常行無休息九十日口常唱阿彌陀佛名無休息九十日心常念阿彌陀佛無休息或唱念俱運或先念後唱或先唱後念唱念相繼無休息時若唱阿彌陀卽是唱十方佛功德等但專以彌陀爲法門主舉要言之步步聲聲念念唯在阿彌陀佛意論止觀者念西方阿彌陀佛去此十萬億佛刹在寶地寶池寶樹寶堂衆菩薩中央坐說經三月常

念佛云何念念三十二相從足下千輻輪相一一逆緣念諸相乃至無見頂亦應從頂相順緣乃至千輻輪令我亦逮是相又念我當從心得佛從身得佛佛不用心得不用身得不用心得佛色不用色得佛心何以故心者佛無心色者佛無色故不用色心得三菩提佛色已盡乃至識已盡佛所說盡者癡人不知智者曉了不用身口得佛不用智慧得佛何以故智慧索不可得自索我了不可得亦無所見一切法本無所有壞本絕本其如夢見七寶親屬歡樂覺已追念不知在何處如是念佛又如舍衛有女名須門聞

9 10 1 2 3 4 5 6 7 8 9 30 1 2 3 4 5 6 7 8

撰述

卷之三

六

之心喜夜夢從事覺已念之彼不來我不往而樂事
宛然當如是念佛如人行大澤飢渴夢得美食覺已
腹空自念一切所有法皆如夢當如是念佛數數念
莫得休息用是念當生阿彌陀佛國是名如相念如
人以寶倚瑠璃上影現其中亦如比丘觀骨骨起種
種光此無持來者亦無有是骨是意作耳如鏡中像
不外來不中生以鏡淨故自見其形行人色清淨所
有者清淨欲見佛即見佛見即問問即報聞經大歡
喜^其自念佛從何所來我亦無所至我所念即見心
作佛心自見心見佛心是佛心是我心見佛心不自

知心心不自見心心有想爲癡心無想是泥洹是法
無可示者皆念所爲設有念亦了無所有空耳^三偈
云心者不知心有心不見心心起想即癡無想即泥
洹諸佛從心得解脫心者無垢名清淨五道鮮潔不
受色有解此者成大道是名佛印無所貪無所著無
所求無所想所有盡所欲盡無所從生無所可滅無
所壞敗道要道本是印二乘不能壞何況魔邪^云婆
沙明新發意菩薩先念佛色相相體相業相果相用
得下勢力次念佛四十不共法心得中勢力次念佛實
佛得佛上勢力而不著色法二身偈云不貪著色身

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

法身亦不著善知一切法永寂如虛空勸修者若人欲得智慧如大海令無能爲我作師者於此坐不運神通悉見諸佛悉聞所說悉能受持者常行三昧於諸功德最爲第一此三昧是諸佛母佛眼佛父無生大悲母一切諸如來從是二法生碎大千地及草木爲塵一塵爲一佛刹滿爾世界中寶用布施其福甚多不如聞此三昧不驚不畏況信受持讀誦爲人說況定心修習如穀牛乳頃況能成是三昧故無量無量婆沙云劫火官賊怨毒龍獸衆病侵是人者無有是處此人常爲天龍八部諸佛皆共護念稱讚皆共

欲見共來其所若聞此三昧如上四番功德皆隨喜三世諸佛菩薩皆隨喜復勝上四番功德若不修如是法失無量重寶人天爲之憂悲如飄人把栴檀而不艶如田家子以摩尼珠博一頭牛云○三明半行半坐亦先方法次勸修方法者身開遮口說默意止觀此出二經方等云旋百二十匝卻坐思惟法華云其人若行若立讀誦是經若坐思惟是經我乘六牙白象現其人前故知俱用半行半坐爲方法也方等至尊不可聊爾若欲修習神明爲證先求夢王若得見一是許懺悔於閑靜處莊嚴道場香泥塗地及室

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

度量衡表

内外作圓壇彩畫懸五色旛燒海岸香然燈敷高座
 請二十四尊像多亦無妨設餚饌盡心力須新淨衣
 襪屨無新浣故出入著脫無令參雜七日長齋日三
 時洗浴初日供養僧隨意多少別請一明了內外律
 者爲師受二十四戒及陀羅尼呪對師說罪要用月
 八日十五日當以七日爲一期決不可減若能更進
 隨意堪任十人已還不得出此俗人亦許須辦單縫
 三衣備佛法式也口說默者預誦陀羅尼呪一篇使
 利於初日分異口同音三徧召請三寶十佛方等父
 母十法王子召請法在國清百錄中請竟燒香運念

三業供養供養訖禮前所請三寶禮竟以志誠心悲
 泣雨淚陳悔罪咎竟起旋百二十匝一旋一呪不遲
 不疾不高不下旋呪竟禮十佛方等十法王子如是
 作已卻坐思惟思惟訖更起旋呪旋呪竟更卻坐思
 惟周而復始終竟七日其法如是從第二時略召請
 餘悉如意止觀者經令思惟思惟摩訶祖持陀羅
 尼翻爲大祕要遮惡持善祕要祇是實相中道正空
 經言吾從真實中來真實者寂滅相寂滅相者無有
 所求求者亦空得者著者實者來者語者問者悉空
 寂滅涅槃亦復皆空一切虛空分界亦復皆空其一無

所求中吾故求之如是空空眞實之法當於何求六
波羅蜜中求其此與大品十八空同大經迦毗羅城
空如來空大涅槃空更無有異以此空慧歷一切事
無不成觀方等者或言廣平今言方者法也般若有
四種方法謂四門入清涼池卽方也所契之理平等
大慧卽等也令求夢王卽二觀前方便也道場卽清
淨境界也治五住糠顯實相米亦是定慧用莊嚴法
身也香塗者卽無上尸羅也五色蓋者觀五陰免子
縛起大慈悲覆法界也圓壇者卽實相不動地也繒
旛卽翻法界上迷生動出之解旛壇不相離卽動出

不動出不相離也香燈卽戒慧也高座者諸法空也
一切佛皆栖此空二十四像者卽是逆順觀十二因
緣覺了智也餚饌者卽是無常苦醉助道觀也新淨
衣者卽寂滅忍也瞋惑重積稱故翻瞋起忍名爲新
七日卽七覺也一日卽一實諦也三洗卽觀一實修
三觀蕩三障淨三智也一師者卽一實諦也二十四
戒者逆順十二因緣發道共戒也呪者囑對也瓔珞
明十二因緣有十種卽有一百二十支一呪一支東
而言之祇是三道謂苦業煩惱也今呪此因緣卽是
呪於三道而論懺悔事懺懺苦道業道理懺懺煩惱

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

道文云犯沙彌戒乃至大比丘戒若不還生無有是處卽懺業道文也眼耳諸根清淨卽懺苦道文也第七日見十方佛聞法得不退轉卽懺煩惱道文也三障去卽十二因緣樹壞亦是五陰舍空思惟實相正破於此故名諸佛實法懺悔也勸修者諸佛得道皆由此法是佛父母世間無上大寶若能修行得全分寶但能讀誦得中分寶華香供養得下分寶佛與文殊說下分寶所不能盡況中上耶若從地積寶至梵天以奉於佛不如施持經者一食克軀如經廣說云約法華亦明方法勸修方法者身開遮口說默意止

觀身開爲十一嚴淨道場二淨身三三業供養四請佛五禮佛六六根懺悔七遶旋八誦經九坐禪十證相別有一卷名法華三昧是天台師所著流傳於世行者宗之此則兼於說默不復別論也意止觀者普賢觀云專誦大乘不入三昧日夜六時懺六根罪安樂行品云於諸法無所行亦不行不分別二經本爲相成豈可執文拒競蓋乃爲緣前後互出非碩異也安樂行品護持讀誦解說深心禮拜等豈非事耶觀經明無相懺悔我心自空罪福無主慧日能消除豈非理耶南岳師云有相安樂行無相安樂行豈非就

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

事理得如是名特是行人涉事修六根儀爲悟入弄引故名有相若直觀一切法空爲方便者故言無相妙證之時悉皆兩捨若得此意於二經無疑今歷文修觀言六牙白象者是菩薩無漏六神通牙有利用如通之捷疾象有大力表法身荷負無漏無染稱之爲白頭上三人一持金剛杵一持金剛輪一持如意珠表三智居無漏頂云杵擬象能行表慧導行輪轉表出假如意表中牙上有池表八解是禪體通是定用體用不相離故牙端有池池中有華華表妙因以神通力淨佛國土利益衆生卽是因因從通生如華

由池發華中有女女表慈若無無緣慈豈能以神通力促身令小入此娑婆通由慈運如華擎女女執樂器表四攝也慈修身口現種種同事利行財法二施引物多端如五百樂器音聲無量也示喜見身者是普現色身三昧也隨所宜樂而爲現之未必純作白玉之像語言陀羅尼者卽是慈熏口說種種法也皆法華三昧之異名得此意於象身上自在作法門也勸修者普賢觀曰若七衆犯戒欲一彈指頃除滅百千萬億阿僧祇劫生死之罪者欲發菩提心不斷煩惱而入涅槃不離五欲而淨諸根見障外事欲見分

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

廣論上卷第十三

身多寶釋迦佛者欲得法華三昧一切語言陀羅尼入如來室著如來衣坐如來座於天龍八部衆中說法者欲得文殊藥王諸大菩薩持華香住立空中侍奉者應當修習此法華經讀誦大乘念大乘事令此空慧與心相應念諸菩薩母無上勝方便從思實相生衆罪如霜露慧日能消除成辦如此諸事無不足以能持此經者則爲得見我亦見於汝亦供養多寶及分身令諸佛歡喜如經廣說誰聞如是法不發菩提心除彼不肖人癡暝無智者耳○四非行非坐三昧者上一向用行坐此旣異上爲成四句故名非行

非坐實通行坐及一切事而南岳師呼爲隨自意意起卽修三昧大品稱覺意三昧意之趣向皆覺識明了雖復三名實是一法今依經釋名覺者照了也意者心數也三昧如前釋行者心數起時反照觀察不見動轉根原終未來處去處故名覺意諸數無量何故對意論覺窮諸法源皆由意造故以意爲言端對境覺知異乎木石名爲心次心籌量名爲意了了別知名爲識如是分別墮心想見倒中豈名爲覺覺者了知心中非有意亦非不有意心中非有識亦非不有識意中非有心亦非不有心意中非有識亦非不

有識識中非有意亦非不有意識中非有心亦非不
有心心意識非一故立三名非三故說一性若知名
非名則性亦非性非名故不三非性故不一非三故
不散非一故不合不合故不空不散故不有非有故
不常非空故不斷若不見常斷終不見一異若觀意
者則攝心識一切法亦爾若破意無明則壞餘使皆
去故諸法雖多但舉意以明三昧觀則調直故言覺
意三昧也隨自意非行非坐準此可解就此爲四一
約諸經二約諸善三約諸惡四約諸無記諸經行法
上三不攝者卽屬隨自意也且約請觀音示其相於

靜處嚴道場旛蓋香燈請彌陀像觀音勢至二菩薩
像安於西方設楊枝淨水若便利左右以香塗身澡
浴清淨著新淨衣齋日建首當正向西方五體投地
禮三寶七佛釋尊彌陀三陀羅尼二菩薩聖衆禮已
胡跪燒香散華至心運想如常法供養已端身正心
結跏趺坐繫念數息十息爲一念十念成就已起燒
香爲衆生故三徧請上三寶請竟三稱三寶名加稱
觀世音合十指掌誦四行偈竟又誦三篇呢或一徧
或七徧看時早晚誦呢竟披陳懺悔自憶所犯發露
洗浣已禮上所請禮已一人登高座若唱若誦此經

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

文餘人諦聽午前初夜其方法如此餘時如常儀若嫌闕略可尋經補益云經云眼與色相應云何攝住乃至意與攀緣相應云何攝住者大集云如心住如卽空也此文一一皆入如實之際即是如空之異名耳地無堅者若謂地是有有卽實實是堅義若謂地是無是亦有亦無非有非無是事實皆是堅義今明畢竟不可得亡其堅性也水性不住者謂水爲有有卽是住乃至謂水是非有非無亦卽是住今不住有四句亦不住無四句中亦不住不可說中故言水性不住風性無礙者觀風爲有有卽是礙乃至謂風非

有非無亦無無四句故言風性無礙火大不實者火不從自生乃至不從無因生本無自性賴緣而有故言不實觀色旣爾受想行識一一皆入如實之際觀陰旣爾十二因緣如谷響如芭蕉堅露電等一時運念令空觀成勤須修習使得相應觀慧之本不可闕也銷伏毒害陀羅尼能破報障毗舍離人平復如本破惡業陀羅尼能破業障破梵行人蕩除蠶穢令得清淨六字章句陀羅尼能破煩惱障淨於三毒根成佛道無疑六字卽是六觀世音能破六道三障所謂大悲觀世音破地獄道三障此道苦重宜用大悲大

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

慈觀世音破餓鬼道三障此道飢渴宜用大慈師子無畏觀世音破畜生道三障獸王威猛宜用無畏也大光普照觀世音破阿脩羅道三障其道猜忌嫉妬偏宜用普照也天人丈夫觀世音破人道三障人道有事理事伏嬌慢稱天人理則見佛性故稱丈夫大梵深遠觀世音破天道三障梵是天王標王得臣也廣六觀世音即是二十五三昧大悲即是無垢三昧大慈即是心樂三昧師子即是不退三昧大光即是歡喜三昧丈夫即是如幻等四三昧大梵即是不動等十七三昧自思之可見云此經通三乘人懺悔若

自調自度殺諸結賊成阿羅漢若福厚根利觀無明行等成緣覺道若把大悲身如瑠璃毛孔見佛得首楞嚴住不退轉諸大乘經有此流類或七佛八菩薩懺或虛空藏八百日塗廁如此等皆是隨自意攝云○二歷諸善即爲二先分別四運次歷衆善初明四運者夫心識無形不可見約四相分別謂未念欲念念已未念名心未起欲念名心欲起念名正緣境住念已名緣境謝若能了達此四即入一相無相問未念未起已念已謝此二皆無心無心則無相云何可觀答未念雖未起非畢竟無如人未作作後便作

9 10 1 2 3 4 5 6 7 8 9 30 1 2 3 4 5 6 7 8

作不可以未作作故便言無人若定無人後誰作作
以有未作作人則將有作作心亦如是因未念故得
有欲念若無未念何得有欲念是故未念雖未有不
得畢竟無念也念已雖滅亦可觀察如人作竟不得
言永滅若永滅者則是斷見無因無果是故念已雖
滅亦可得觀問過去已去未來未至現在不住若離
三世則無別心觀何等心答汝問非也若過去永滅
畢竟不可知未來未起不可知現在無住不可知云
何諸聖人知三世心鬼神尚知自他三世云何佛法

行人起斷滅龜毛兔角見當知三世心雖無定實亦
可得知故偈云諸佛之所說雖空亦不斷相續亦不
常罪福亦不失若起斷滅如盲對色於佛法中無正
觀眼空無所獲行者既知心有四相隨心所起善惡
諸念以無住著智反照觀察也次歷善事善事衆多
且約六度若有諸塵須捨六受若無財物須運六作
捨運共論有十二事初論眼受色時未見欲見見見
已四運心皆不可見亦不得不見又反觀覺色之心
不從外來外來於我無預不從內出內出不待因緣
旣無内外亦無中間不常自有當知覺色者畢竟空

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

寂所觀色與空等能觀色者與盲等乃至意緣法未
緣欲緣緣已四心皆不可得反觀覺法之心不外
來不內出無法塵無法者悉與空等是爲覺六受觀
云眼根色塵空明各各無見亦無分別因緣和合生
眼識眼識因緣生意識意識生時卽能分別依意識
則有眼識眼識能見見已生貪染於色毀所受戒
此是地獄四運意實愛色覆諱言不此鬼道四運於
色生著而計我我所畜生四運我色他色我勝他劣
阿脩羅四運他惠我色不與不取於此色上起仁讓
貞信明等五戒十善人天四運觀四運心心相生滅

心心不住心心三受心心不自在心心屬因緣二乘
四運觀已四運過患如此觀他四運亦復如是卽起
慈悲而行六度所以者何六受之塵性相如此無量
劫來頑愚保著而不能捨捨不能亡今觀塵非塵於
塵無受觀根非根於已無著觀人叵得亦無受者三
事皆空名檀波羅蜜金剛般若云若住色聲香味觸
法布施是名住相布施如人入闇則無所見不住聲
味布施是無相施如人有目日光明照見種種色直
言不見相略猶難解今不見色有相無相亦有無相
非有無相若處處著相引之令得出不起六十二見

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

乃名無相檀到於彼岸一切法趣檀成摩訶衍是菩薩四運又觀四運與虛空等卽常不受四運卽樂不爲四運起業卽我四運不能染卽淨是佛法四運如是四運雖空空中具見種種四運乃至徧見恒沙佛法成摩訶衍是爲假名四運若空不應具十法界法界從因緣生體復非有非有故空非空故有不得空有雙照空有三諦宛然備佛知見於四運心具足明了觀聲香味觸法五受四運心圓覺三諦不可思議亦復如是準前可知不復煩記

摩訶止觀卷第二

音釋

盥古玩切 溼手也 軫居候切 取 騞鳥貢切 鼻切 鞍雄皆切 辮

屬訖約切 洩合管切 灑

浣衣垢也

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

摩訶止觀

卷三

下

卷三

下

卷三

下

卷三

下

音釋

音釋

音釋

音釋

音釋

音釋

音釋

音釋

摩訶止觀卷第二下

隋天台智者大師說
門人灌頂記

次觀六作行檀者觀未急行欲行行已四運遲速皆不可得亦不見不可得反觀覺心不外來不內出不中間不常自有無行無行者畢竟空寂而由心運役故有去來或爲毀戒或爲詭他或爲眷屬或爲勝彼或爲義讓或爲善禪或爲涅槃或爲慈悲捨六塵運六作方便去來舉足下足皆如幻化悅惄虛忽亡能亡所千里之路不謂爲遙數步之地不謂爲近凡

有所作不唐其功不望其報如此住檀攝成一切恒
沙佛法具摩訶衍能到彼岸又觀一運心十法具足
一不定一故得爲十十不定十故得爲一非一非十
雙照一十一念心中具足三諦住坐卧語默作作亦
復如是準前可知故法華云又見佛子名衣上服以
用布施以求佛道卽此義也前約十二事共論檀今
約一事各各論六行者行時以大悲眼觀衆生不
得衆生相衆生於菩薩得無怖畏是爲行中檀於衆
生無所傷損不得罪福相是名尸行時心想不起亦
無動搖無有住處陰入界等亦悉不動是名忍行時

不得舉足下足心無前思後覺一切法中無生住滅
是名精進不得身心生死涅槃一切法中無受念著
不味不亂是名禪行時頭等六分如雲如影夢幻響
化無生滅斷常陰界入空寂無縛無脫是名般若具
如首楞嚴中廣說又行中寂然有定相若不察之於
定生滌蕩著禪味今觀定心心尚無心定在何處當
知此定從顛倒生如是觀時不見於空及與不空卽
破定相不生貪著以方便生是菩薩解行者未悟或
計我能觀心謂是妙慧著慧自高是名智障同彼外
道不得解脫卽反照能觀之心不見住處亦無起滅

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

居言上卷六

畢竟無有觀者及非觀者觀者既無誰觀諸法不得觀心者卽離觀想大論云念想觀已除戲論心皆滅無量衆罪除清淨心常一如是尊妙人則能見般若大集云觀於心心卽此意也如是行中具三昧初觀破一切種種有相不見內外卽空三昧次觀能壞空相名無相三昧後觀不見作者卽無作三昧又破三倒三毒越三有流伏四魔怨成波羅蜜攝受法界增長具足一切法門豈止六度三三昧而已矣若於行中具足一切法者餘十一事亦復如是次更歷六塵中兢持謹潔如擎油鉢一滴不傾又於六作中威儀肅肅進退有序但名持戒持戒果報升出受樂非是三昧不名波羅蜜若得觀慧於十二事尸羅自成謂觀未見色欲見見見已四運心種種推求不得所起之心亦不得能觀之心不內外無去來寂無生滅一能如是觀身口七支淨若虛空是持不缺不破不穿三種律儀戒破四運諸惡覺觀卽持不雜戒也不爲四運所亂卽持定其戒也四運心不起卽持道共戒也分別種種四運無滯卽持無著戒也分別四運不謬卽持智所讚戒也知四運攝一切法卽持大乘自在戒也識四運四德卽持究竟戒其心既明淨雙

支那
河上見卷六
三

儀肅肅進退有序但名持戒持戒果報升出受樂非是三昧不名波羅蜜若得觀慧於十二事尸羅自成謂觀未見色欲見見見已四運心種種推求不得所起之心亦不得能觀之心不內外無去來寂無生滅一能如是觀身口七支淨若虛空是持不缺不破不穿三種律儀戒破四運諸惡覺觀卽持不雜戒也不爲四運所亂卽持定其戒也四運心不起卽持道共戒也分別種種四運無滯卽持無著戒也分別四運不謬卽持智所讚戒也知四運攝一切法卽持大乘自在戒也識四運四德卽持究竟戒其心既明淨雙

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

遮二邊正入中道雙照二諦不思議佛之境界具足無滅其色者色法受者不可得三事皆亡卽檀於色者安心不動名忍色色者無染無間名毗梨耶不爲色色者所亂名禪色色者如幻如化名般若色色者如虛空名空三昧不得此空名無相三昧無能無所名無作三昧何但三諦六度三空一切恒沙佛法皆例可解觀色塵旣爾餘五塵亦然六受六作亦如是法華云又見佛子威儀具足以求佛道卽此義也次歷忍善者還約作受皆有違順順是可意違不可意於違不曠於順不受無見無見者無作無作者皆

如上說次歷精進善舊云精進無別體但篤衆行義而推之應有別體例無明通入衆使更別有無明今且寄誦經勤策其心以擬精進晝夜不虧乃得滑利而非三昧慧今觀氣息觸七處和合出聲如響不內不外無能誦所誦悉以四運推檢於塵不起受者於緣不生作者煩惱不間誦說念念流入大涅槃海是名精進云次歷諸禪根本九想背捨等但是禪非波羅蜜觀入定四運尚不見心何處有定卽達禪實相以禪攝一切法故論第五解八想竟明十力四無所畏一切法諸論師不達玄旨咸謂論誤未應說此此

是論王明八想作摩訶衍相故廣釋諸法耳云五次歷
智慧者釋論八種解般若今且約世智用觀六受六
作四運推世智叵得皆如上說約餘一切善法亦如
是問若一法攝一切法者但用觀即足何須用止一
度卽足何用五度耶答六度宛轉相成如被甲入陣
不可不密云觀如燈止如密室浣衣刈草等云又般
若爲法界徧攝一切亦不須餘法餘法爲法界亦攝
一切亦不須般若又般若卽諸法諸法卽般若無二
無別云○三以隨自意歷諸惡事者夫善惡無定如
諸蔽爲惡事度爲善人天報盡還墮三塗已復是惡

何以故蔽度俱非動出體皆是惡二乘出苦名之爲
善二乘雖善但能自度非善人相大論云寧起惡癩
野干心不生聲聞辟支佛意當知生死涅槃俱復是
惡六度菩薩慈悲兼濟此乃稱善雖能兼濟如毒器
貯食食則殺人已復是惡三乘同斷此乃稱好而不
見別理還屬一邊無明未吐已復是惡別教爲善雖
見別理猶帶方便不能稱理大經云自此之前我等
皆名邪見人也邪豈非惡唯圓法名爲善善順實相
名爲道背實相名非道若達諸惡非惡皆是實相卽
行於非道通達佛道若於佛道生著不消甘露道成

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

非道如此論善惡其義則通今就別明善惡事度是
 善諸蔽爲惡善法用觀已如上說就惡明觀今當說
 前雖觀善其蔽不息煩惱浩然無時不起若觀於他
 惡亦無量故修一切世間不可樂想時則不見好人
 無好國土純諸蔽惡而自纏裹縱不全有蔽而偏起
 不善或多慳貪或多犯戒多瞋多怠多嗜酒味根性
 易奪必有過患其誰無失出家離世行猶不備白衣
 若縱惡蔽摧折俯墜永無出期當於惡中而修觀慧
 如佛世時在家之人帶妻挾子官方俗務皆能得道

央掘摩羅彌殺彌慈祇陀末利唯酒唯戒和須蜜多
 姊而梵行提婆達多邪見卽正若諸惡中一向是惡
 不得修道者如此諸人永作凡夫以惡中有道故雖
 行衆蔽而得成聖故知惡不妨道又道不妨惡須陀
 沔人姪欲轉盛卑陵尚慢身子生瞋於其無漏有何
 損益譬如虛空中明暗不相除顯出佛菩提卽此意
 也若人性多貪欲穢濁熾盛雖對治折伏彌更增劇
 但恣趣向何以故蔽若不起不得修觀譬如綸釣魚
 強繩弱不可爭牽但令釣餌入口隨其遠近任縱沈
 浮不久收獲於蔽修觀亦復如是蔽卽惡魚觀卽釣

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

餌若無魚者鉤餌無用但使有魚多大唯佳皆以鉤餌隨之不捨此蔽不久堪任乘御云何爲觀若貪欲起諦觀貪欲有四種相未貪欲欲貪欲正貪欲貪欲已爲當未貪欲減欲貪欲生爲當未貪欲不減欲貪欲生亦減亦不減欲貪欲生非減非不減欲貪欲生若未減欲生爲卽爲離卽減而生生減相違若離而生生則無因未貪不減而欲生者爲卽爲離若卽卽二生相並生則無窮若離生亦無因若亦減亦不減而欲生者若從減生不須亦不減若從不減生不須亦減不定之因那生定果若其體一其性相違若其

體異本不相關若非減非不減而欲貪生雙非之處爲有爲無若雙非是有何謂雙非若雙非是無無那能生如是四句不見欲貪欲生還轉四句不見未貪欲減欲貪欲生不生亦生亦不生非生非不生亦如上說觀貪欲蔽畢竟空寂雙照分明皆如上說是名鉤餌若蔽恒起此觀恒照亦不見起亦不見照而起而照其一又觀此蔽因何塵起色耶餘耶因何作起行耶餘耶若因於色爲未見欲見見見已若因於行未行欲行行行已爲何事起爲毀戒耶爲眷屬耶爲虛誑耶爲嫉妒耶爲仁讓耶爲善禪耶爲涅槃耶爲四

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

卷之二

中

德耶爲六度爲三三昧耶爲恒沙佛法耶其如是觀時於塵無受者於緣無作者而於塵受根緣雙照分明幻化與空及以法性不相妨礙所以者何若蔽礙法性法性應破壞若法性礙蔽應不得起當知蔽卽法性蔽起卽法性起蔽息卽法性息無行經云貪欲卽是道恚癡亦如是如是三法中具一切佛法若人離貪欲而更求菩提譬如天與地貪欲卽菩提淨名云行於非道通達佛道一切衆生卽菩提相不可復得卽涅槃相不可復滅爲增上慢說離姪怒癡名爲解脫無增上慢者說姪怒癡性卽是解脫一切塵

勞是如來種山海色味無二無別卽觀諸惡不可思議理也其常修觀慧與蔽理相應譬如形影是名觀行位能於一切惡法世間產業皆與實觀不相違背是相似位進入銅輪破蔽根本本謂無明本傾枝折顯出佛性是分證真實位乃至諸佛盡蔽源底名究竟位於貪蔽中豎具六卽橫具諸度一切法例如上云次觀瞋蔽若人多瞋鬱鬱勃勃相續恒起斷不得斷伏亦不伏當恣任其起照以止觀觀四種相瞋從何生若不得其生亦不得其滅歷十二事瞋從誰生誰是瞋者所瞋者誰如是觀時不得瞋來去足迹相

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

撰述

貌空寂觀曠十法界觀曠四德如上說云是爲於曠
 非道通達佛道觀犯戒懈亂邪癡等蔽及餘一切惡
 事亦如是○四觀非善非惡卽是無記蒙晭之法所
 以須觀此者有人根性性不作善復不作惡則無隨
 自意出世因緣奈此人何大論云無記中有般若波
 羅蜜者卽得修觀也觀此無記與善惡異耶同耶同
 則非無記異者爲記減無記生記不減無記生記亦
 減亦不減無記生記非減非不減無記生記不可
 得何況無記與記同異耶非同故不合非異故不散
 非合故不生非散故不減又歷十二事中爲何處生

無記爲誰故生無記誰是無記者如此觀時同虛空
 相又無記一法生十法界及一切法又無記卽法性
 法性常寂卽止義寂而常照卽觀義於無記非道通
 達佛道無記爲法界橫攝諸法豎攝六位高廣具足
 例如上說復次但約最後善明隨自意此是次第意
 若善惡俱明隨自意卽是頓意若約攝牒之善明隨
 自意此則不定意云○復次四種三昧方法各異理
 觀則同但三行方法多發助道法門又動障道隨自
 意既少方法少發此事若但解方法所發助道事相
 不能通達若解理觀事無不通又不得理觀意事相

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

卷一百一十一

助道亦不成得理觀意事相三昧任運自成若事相行道入道場得用心出則不能隨自意則無間也方法局二理觀通四云問上三三昧皆有勸修此何獨無答六蔽非道卽解脫道鈍根障重者聞已沈沒若更勸修失旨逾甚淮河之北有行大乘空人無禁捉她者今當說之其先師於善法作觀經久不徹放心向惡法作觀獲少定心薄生空解不識根緣不達佛意純將此法一向教他教他既久或逢一兩得益者如蟲食木偶得成字便以爲證謂是事實餘爲妄語笑持戒修善者謂言非道純教諸人偏造衆惡盲無

眼者不別是非神根又鈍煩惱復重聞其所說順其欲情皆信伏隨從放捨禁戒無非不造罪積山岳遂令百姓忽之如草國王大臣因滅佛法毒氣深入于今未改史記云周末有被髮袒身不依禮度者遂大戎侵國不絕如綻周姬漸盡又阮籍逸才蓬頭散帶後公卿子孫皆效之奴狗相辱者方達自然撙節競持者呼爲田舍是爲司馬氏滅相宇文邕毀廢亦由元嵩魔業此乃佛法滅之妖怪亦是時代妖怪何關慕前達決謂是道又順情爲易恣心取樂而不改迷

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

譬如西施本有心病多喜噴呻百媚皆轉更益美麗
鄰女本醜而數其噴呻可憎彌劇貧者遠徙富者杜
門穴者深潛飛者高逝彼諸人等亦復似是狂狗逐
雷造地獄業悲哉可傷既嗜欲樂不能自止猶如蒼
蠅爲唾所黏浪行之過其事略爾其師過者不達根
性不解佛意佛說貪欲即是道者佛見機宜知一種
衆生底下薄福決不能於善中修道若任其罪流轉
無已令於貪欲修習止觀極不得止故作此說譬如
父母見子得病不宜餘藥須黃龍湯鑿齒瀉之服已
病愈佛亦如是說當其機快馬見鞭影卽到正路貪

欲卽是道佛意如此若有衆生不宜於惡修止觀者
佛說諸善名之爲道佛具二說汝今云何呵善就惡
若其然者汝則勝佛公於佛前灼然違反復次時節
難起王事所拘不得修善令於惡中而習止觀汝今
無難無拘何意純用乳藥毒他慧命故阿含中放牛
人善知好濟令牛羣安隱若好濟有難急不獲已當
從惡濟惡濟多難百不全一汝今無事幸於好濟善
道驅牛何爲惡道自他沈沒破壞佛法損失威光誤
累衆生大惡知識不得佛意其過如是復次夷險兩
路皆有能通爲難從險善惡俱通審機入蔽汝棄善

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

專惡能通達非道何不蹈躡水火穿逾山壁世間險
路尚不能通何況行惡而會正道豈可得乎又不能
知根緣直是一人卽時樂善卽時樂惡好樂不定何
況無量人邪而純以貪欲化他淨名云我念聲聞不
觀人根不應說法二乘不觀尚自差機況汝盲暝無
目師心者乎自是違經不當機理何其愚惑頓至於
此若見有人不識機宜行說此者則戒海死屍宜依
律擯治無令毒樹生長者宅云復次檢其惡行事卽
偏邪汝謂貪欲卽是道陵一切女而不能瞑恚卽是
道害一切男唯愛細滑觸是道畏於打拍苦澀觸則

無有道行一不行一一有道一無道癡闇如漆偏行
汙損譬如死屍穢好花園云難其偏行如前或將水
火刀杖向之其卽默然或答云而汝不見我常能入
此乃違心無慚愧語亦不得六卽之意所以須說此
者上三行法勤策事難宜須勸修隨自意和光入惡
一往則易宜須誠忌如服大黃湯應備白飲而補止
之云問中道正觀以一其心行用卽足何須紛糾四
種三昧歷諸善惡經十二事水濁珠昏風多浪鼓何
益於澄靜耶答譬如貧窮人得少便爲足更不願好
者若一種觀心心若種種當奈之何此則自行爲失

9 10 1 2 3 4 5 6 7 8 9 20 1 2 3 4 5 6 7 8 9 30 1

撰述

若用化他他之根性舛互不同一人煩惱已自無量
何況多人譬如藥師集一切藥擬一切病一種病人
須一種藥治一種病而怪藥師多藥汝問似是煩惱
心病無量無邊如爲一人衆多亦然云何一人若人
欲聞四種三昧聞之歡喜須徧爲說是爲世界以聞
四種次第修行能生善法卽具說四是各各爲人或
宜常坐中治其諸惡乃至隨自意中治其諸惡是名
對治是人具須四法豁然得悟是第一義祇爲一人
尚須因說云何不用耶若爲多人者一人樂常坐三
非所欲一人欲常行三非所樂徧赴衆人之欲卽世

界悉檀也餘三悉檀亦如是又約一種三昧亦具四
悉檀意若樂行卽行樂坐卽坐行時若善根開發入
諸法門是時應行若坐時心地清涼喜悅安快是時
應坐若坐時沈昏則抖擗應行行時散動疲困是時
應坐若行時悅焉虛寂是則應行若坐時湛然明利
是時應坐餘三例爾云問善扶理可修止觀惡乖理
云何修止觀答大論明根遮有四一根利無遮二根
利有遮三根鈍無遮四根鈍有遮初句上品佛世之
時身予等是其人也行人於善法中修止觀者以勤
修善法未來無遮常習止觀令其根利若過去具此

9 10 1 2 3 4 5 6 7 8 9 20

撰述

月言一卷之三

三

二義今生薄修卽得相應從觀行位入相似真實今
生不得入者昔無二義今約善修令未來疾入次句
得道根利而罪積障重佛世之時闍王央掘示其人
也逆罪遮重應入地獄見佛聞法豁爾成聖以根利
故遮不能障今時行人於惡法中修正觀者卽此意
也以起惡故未來有遮修正觀故後世根利若遇知
識鞭入正道云何而言惡法乖理不肯修正觀耶次
根鈍無遮者佛世之時周利槃特^是是其人雖三業
無過根性極鈍九十日誦鳩摩羅偈智者身口意不
造於諸惡繫念常現前不樂著諸欲亦不受世間無

益之苦行今時雖持戒行善不學止觀未來無遮而
悟道甚難後句者卽一切行惡之人又不修正觀者
是也不修正觀故不得道根鈍千偏爲說兀然不解
多造罪惡遮障萬端如癩人身痺針刺徹骨不知不
覺但以諸惡而自纏裹以是義故善雖扶理道由止
觀惡雖乖理根利破遮唯道是尊豈可爲惡而廢止
觀大經云於戒緩者不名爲緩於乘緩者乃名爲緩
應具明緩急四句合上根遮義也^云又經云寧作提
婆達多不作鬱頭藍弗卽其義也應勤聽思修初無
休息如醉婆羅門荆頭戲女披袈裟^云○第三爲明

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

法華經疏

菩薩清淨大果報故說是止觀者若行違中道即有二邊果報若行順中道即有勝妙果報設未出分段所獲華報亦異七種方便況真果報邪香城七重橋津如畫卽其相也此義在後第八重中當廣分別問次第禪門明修證與此果報云何同異答修名習行證名發得又修名習因證名習果皆卽生可獲今論果報隔在來世以此爲異二乘但有習果無有果報大乘具有云○第四爲通裂大網諸經論故說是止觀者若人善用止觀觀心則內慧明了通達漸頓諸教如破微塵出大千經卷恒沙佛法一心中曉若欲

外益衆生逗機設教者隨人堪任稱彼而說乃至成佛化物之時或爲法王說頓漸法或爲菩薩或爲聲聞天魔人鬼十法界像對揚發起或爲佛所問而廣答頓漸或扣機問佛佛答頓漸法輪此義至第九重當廣說攝法中亦略示○第五歸大處諸法畢竟空故說是止觀者夫膠手易著寐夢難惺封文齊意自謂爲是競執瓦礫謂瑠璃珠近事顯語猶尚不識況遠理密教寧當不惑爲此意故須論旨歸旨歸者文旨所趣也如水流趣海炎向空識密達遠無所稽滯譬如智臣解王密語聞有所說皆悉了知到一切

9 10 1 2 3 4 5 6 7 8 9 10 1 2 3 4 5 6 7 8 9 30 1 2 3 4 5 6 7 8

撰述

居言上卷第四

五

智地得此意者卽解旨歸旨者自向三德歸者引他同入三德故名旨歸又自入三德名歸令他入三德名旨故名旨歸今更總別明旨歸諸佛爲一大事因緣出現於世示種種像咸令衆生同見法身見法身已佛及衆生俱歸法身又佛說種種法咸令衆生究竟如來一切種智種智具已佛及衆生俱歸般若又佛現種種方便神通變化解脫諸縛不令一人獨得滅度皆以如來滅度而滅度之既滅度已佛及衆生俱歸解脫大經云安置諸子祕密藏中我亦不久自住其中是名總相旨歸別相者身有三種一者色身

二者法門身三者實相身若息化論歸者色身歸解脫法門身歸般若實相身歸法身般若說有三種一說道種智二說一切智三說一切種智若息化論歸道種智歸解脫一切智歸般若一切種智歸法身解脫有三種一解無知縛二解取相縛三解無明縛若息化歸真解無知縛歸解脫解取相縛歸般若解無明縛歸法身以是義故別相旨歸亦歸三德祕密藏中復次三德非三非一不可思議所以者何若謂法身直法身者非法身也當知法身亦身非身非身非身住首楞嚴種種示現作衆色像故名爲身所作

辨已歸於解脫智慧照了諸色非色故名非身所作
辦已歸於般若實相之身非色像身非法門身是故
非身非非身所作辦已歸於法身達此三身無一異
相是名爲歸說此三身無一異相是名爲旨俱入祕
藏故名旨歸若謂般若直般若者非般若也當知般
若亦知非知非知非知道種智般若徧知於俗故
各爲知所作辦已歸於解脫一切智般若徧知於真
故名非知所作辦已歸於般若一切種智般若徧知
於中故名非知非非知所作辦已歸於法身達三般
若無一異相是名爲歸說三般若無一異相是名爲
若無一異相是名爲歸說三般若無一異相是名爲

旨俱入祕藏故名旨歸若謂解脫直解脫者非解脫
也當知解脫亦脫非脫非脫非非脫方便淨解脫調
伏衆生不爲所染故名爲脫所作辦已歸於解脫圓
淨解脫不見衆生及解脫相故名非脫所作辦已歸
於般若性淨解脫則非脫非非脫所作辦已歸於法
身若達若說如此三脫非一異相俱入祕藏故名旨
歸復次三德非新非故而新而故所以者何三障障
三德無明障法身取相障般若無知障解脫三障先
有名之爲故三德破三障今始得顯故名爲新三障
卽三德三德卽三障三障卽三德三障非故三德卽

9 10 1 2 3 4 5 6 7 8 9 20 1 2 3 4 5 6 7 8 9 30 1

三障三德非新非新而新則有發心所得之三德乃至究竟所得之三德非故而故則有發心所治之三障乃至究竟所治之三障新非新故非故則有理性之三德若總達三德非新非故而新而故無一異相爲他亦然卽是旨歸祕密藏中又說者無明先有名爲故法身是明破於無明名爲新無明卽明明卽無明無明卽明無明非故明卽無明明則非新取相先有名之爲故無相破相無相名新相卽無相無相卽相何新何故無知先有名之爲故知破無知知名爲新無知卽知知卽無知何新何故若達總別新故無

一異相若爲他說亦復如是是名旨歸入祕密藏縱橫開合始終等例皆如是復次旨歸亦復如是謂旨非旨非旨非非旨歸非歸非歸非歸一一悉須入祕密藏中例上可解旨自行故非旨化他故非旨非非旨無自他故旨歸三德寂靜若此有何名字而可說示不知何以名之強名中道實相法身非止非觀等亦復强名一切種智平等大慧般若波羅蜜觀等亦復强名首楞嚴定大涅槃不可思議解脫止等當知種種相種種說種種神力一一皆入祕密藏中何等是旨歸旨歸何處誰是旨歸言語道斷心行處滅

9 10 1 2 3 4 5 6 7 8 9 20 1 2 3 4 5 6 7 8 9 30 1

撰述

風言

七

永寂如空是名旨歸至第十重中當廣說也
摩訶止觀卷第二 下

機訖

第十一紙一行

純作純

音釋

悅

詡切

刈

疑肺切

蓼

蓼草切

蕡

蓼都切

母

鄧切

綻

私箭切

也

後敎切

撙

祖本切

尼

占切

黏

相著也

舛

錯亂也

抖

攪切

抖

當口切

擞

蘇后切

痺

必至切

冷

冽也

瘞

研計切

寐

中有言也

嘉興府楞嚴寺經坊餘貲刻此

摩訶止觀第一本

崇禎甲申仲春般若堂識

摩訶止觀卷第三 上

隋天台智者大師說

門人灌頂記

第二釋止觀名者大途梗概已如上說復以何義立
止觀名略有四一相待二絕待三會異四通三德一
相待者止觀各二義息義停義對不止止義息義者
諸惡覺觀妄念思想寂然休息淨名曰何謂攀緣謂
緣三界何謂息攀緣謂心無所得此就所破得名是
止息義停義者緣心諦理繫念現前停住不動仁王
云入理般若名爲住大品云以不住法住般若波羅

蜜中此就能止得名即是停止義對不止以明止者語雖通上意則永殊何者上兩止對生死之流動約涅槃論止息心行理外約般若論停止此約智斷通論相待今別約諦理論相待無明卽法性法性卽無明無明亦非止非不止而喚無明爲不止法性亦非止非不止而喚法性爲止此待無明之不止喚法性而爲止如經法性非生非滅而言法性寂滅法性非垢非淨而言法性清淨是爲對不止而明止也觀亦三義貫穿義觀達義對不觀觀義貫穿義者智慧利用穿滅煩惱大經云利饅斷地磐石砂礫直至金剛

法華云穿鑿高原猶見乾燥土施功不已遂漸至泥此就所破得名立貫穿觀也觀達義者觀智通達契會真如瑞應云息心達本源故號爲沙門大論云清淨心常一則能見般若此就能觀得名故立觀達觀也對不觀觀者語雖通上意則永殊上兩觀亦通對生死彌密而論貫穿迷惑昏盲而論觀達此通約智斷相待明觀今別約諦理無明卽法性法性卽無明無明非觀非不觀而喚無明爲不觀法性亦非觀非不觀而喚法性爲觀如經云法性非明非闇而喚法性爲明第一義空非智非愚而喚第一義空爲智是

爲對不觀而明觀也是故止觀各從三義得名○二
絕待明止觀者卽破前三相待止觀也先橫破次豎
破若止息止從所破得名者照境爲正除惑爲傷旣
從所離得名名從傍立卽墮他性若停止止從能破
得名照境爲正除惑爲傷旣言能照名從智生卽墮
自性若非妄想息故止非住理故止智斷因緣故止
名從合生卽墮共性若非所破非能破而言止者此
墮無因性故龍樹曰諸法不自生亦不從他生不共
不無因是故說無生無生止觀豈從四句立名四句
立名是因待生可思可說是結惑生可破可壞起滅

流動之生何謂停止迷惑顛倒之生何謂觀達耶又
豎破者若從四句生者卽是生生非止觀也若能止
息見思停住真諦此乃待生生說生不生之止觀耳
若以空心入假止息塵沙停住俗理此乃待生不生
說不生生之止觀耳若止息無明停心中理此是待
生死涅槃一邊不止而論止觀耳皆是待對可思議
生結惑可破壞尚未是止何況不止猶自非觀何況
不觀何以故遣執不盡故言語道不斷故業果不絕
故今言絕待止觀者絕橫豎諸待絕諸思議絕諸煩
惱諸業諸果絕諸教觀證等悉皆不生故名爲止止

亦不可得觀冥如境境旣寂滅清淨尚無清淨何得
有觀止觀尚無何得待不止觀說於止觀待於止觀
說不止觀待止不止說非止非不止故知止不止皆
是爲非止非不止亦不可得待對旣絕卽非有爲
不可以四句思故非言說道非心識境旣無名相結
惑不生則無生死則不可破壞滅絕絕滅故名絕待
止顛倒想斷故名絕待觀亦是絕有爲止觀乃至絕
生死止觀絕待止觀則不可說若有四悉檀因緣故
亦可得說若有世界因緣則會異而說若有爲人因
緣則通三德而說若有對治因緣則相待而說若有

第一義因緣則絕待而說說爲止觀此之名字不在
內外兩中間亦不常自有是字不住亦不不住是字
不在橫四句豎四句中故言是字不住亦不在無橫
無豎中故言亦不不住是字不可得故名絕待止
觀亦名不思議止觀亦名無生止觀亦名一大事止
觀故如此大事不對小事譬如虛空不因小空名爲
大也止觀亦爾不因愚亂名爲止觀無可待對獨一
法界故名絕待止觀也世人約種種語釋絕待義終
不得絕何以故凡情馳想種種推畫分別悟與不悟
心與不心凡聖差別絕則待於不絕不思議待思議

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

撰述

廣弘明集卷五

輪轉相待絕無所寄若得意亡言心行亦斷隨智妙悟無復分別亦不言悟不悟聖不聖心不心思議不思議等種種妄想緣理分別皆名爲待真慧開發絕此諸待絕卽復絕如前火木名爲絕待故淨名云諸法不相待乃至一念不住故卽此意也若爾絕待乃是聖境初心無分今以六卽望之初心無所失聖境無所濫三會異者如此絕待止觀亦名不可思議亦名爲大大經云大名不可思議也諸餘經論或名遠離或名不住不著無爲寂滅不分別禪定棄除捨等如是一切皆是止之異名止旣絕大不可思議遠離

等皆絕大不可思議餘處或名知見明識眼覺智慧照了鑒達等如是一切皆是觀之異名觀旣絕大不可思議知見等皆絕大不可思議所以者何般若是
一法佛說種種名解脫亦爾多諸名字亦如虛空無所有不動無礙當知三德祇是一法隨衆生類爲之立異字若聞絕待慎莫驚畏若聞會異慎莫疑惑而自毀傷也又止觀自相會者止亦名觀亦名不止觀亦名止亦名不觀卽前釋名意同也○四通三德者若衆經異名皆是止觀者名則無量義亦無量何故但以三義釋止觀耶爲對三德作此釋耳諸法無量

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

何故獨對三德大論云菩薩從初發心常觀涅槃行道大經云佛及衆生皆悉安置祕密藏中祕藏即是涅槃涅槃卽是三德三德卽是止觀自他初後皆得修入故用對之耳若用兩字共通三德者止卽是斷斷通解脫觀卽是智智通般若止觀等者名爲捨相捨相卽是通於法身又止卽奢摩他觀卽毗婆舍那他那等故卽憂畢又通三德如前問止觀是二法豈得通不思議三德耶答還以不思議止觀故得通耳又大品明十八空釋般若百八三昧釋禪雖前後兩釋豈可禪無般若般若無禪特是不二而二二則不

二不二卽法身二卽定慧如此三法未曾相離是故大經云佛性有五種名或名首楞嚴或名般若今非止非觀或名爲止或名爲觀卽是不思議止觀通於不思議三德復次止觀各通三德者止中有觀觀中有止如止息止是止善屬定門攝卽通解脫停止止是行善屬觀門攝卽通般若非止止屬理攝卽通法身其義可見也貫穿觀是止善定門攝卽通解脫觀達觀是行善觀門攝卽通般若非觀觀理攝卽通法身意亦可見復次止觀共通三德者止息止貫穿觀皆從所離得名卽通解脫停止止觀達觀皆從能緣

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

之智得名卽通般若非止止非觀觀皆名法性卽通法身復次三德通於止觀者還以三德共通兩字又應三德各通兩字三德共通者解脫通止般若通觀法身通非止非觀三德各通止觀者夫解脫者具足解脫具有三種方便淨解脫通止息止圓淨解脫通停止止性淨解脫通非止止夫般若者具足般若具有三種道慧般若通貫穿觀道種慧般若通觀達觀一切種慧般若通非觀觀具足法身亦有三種色身通一止一觀法門身通一止一觀實相身通一止一觀其義可見也若信三德絕大不思議通義既明須

信止觀絕大不思議若信涅槃三法具足名祕密藏亦信三止具足名大寂定名祕密藏亦信三觀具足名大智慧名祕密藏亦信非止非觀三法具足名祕密藏若信三德不縱不橫不並不別如三點三目者亦信三止三觀不縱不橫不並不別也而諸經赴緣偏舉一法以示義端如首楞嚴偏舉止邊止具一切法不減少亦名祕密藏智度法華偏舉觀邊觀具一切法不減少亦名祕密藏智度法華偏舉觀邊觀具一切法不減少亦名祕密藏涅槃舉三法具足法亦不多亦名祕密藏止觀亦爾若開若合開亦不多合亦不少一一皆是法界攝一切法悉名祕密藏偏舉尚爾況圓舉耶

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

止觀通三德既爾通諸異名遠離知見等亦如是又
通諸三名所謂三菩提三佛性三寶等一切三法亦
如是問云何字義縱橫云何字義不縱不橫答諸小
乘師說般若種智已圓果縛尚在解脫未具身猶雜
食又帶無常一優一劣譬之橫川走火又云先有相
好之身次得種智般若後滅身智方具解脫既有上
下前後之義譬之縱三點水若入滅定有身而無智
羅漢在無色有智而無身若入無餘但有孤調解脫
此義各各不相關並之則橫累之則縱分之則異諸
大乘師說法身是正體有佛無佛本自有之非適今

也了因般若無累解脫此一當有隔生跨世彌亘淨
穢此字義縱也又言三德無前後一體具足以體從
義而有三異蓋乃體橫而義縱耳又言體義俱不殊
而有隱顯之異俱不異未免橫隱顯異未免縱衆釋
如此寧與經會今明三德皆不可思議那忽縱皆不
可思議那忽橫皆不可思議那忽一皆不可思議那
忽異此約理藏釋身常智圓斷具一切皆是佛法無
有優劣故不縱三德相冥同是一法界出法界外何
處更別有法故不橫能種種建立故不一同歸第一
義故不異此約行因釋也卽一而三故不橫卽三而

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

唐詩一卷

一故不縱不三而三故不一不一而一故不異此約字用釋也真伊字義爲若此問三德四德其意云何答通論三德一一皆常樂我淨大經云諸佛所師所謂法也以法常故諸佛亦常法卽法身佛卽般若解脫故作通解也大經云因滅是色獲得常色受想行識亦復如是則法身皆常樂我淨二德亦然若依一種轉色成法身法身常樂轉識想成般若般若卽淨轉受行成解脫解脫則我又依念處轉識成常轉受成樂轉想行成我轉色成淨是則通別各有二解依圓是頓義依別是漸義云問三障及三道皆障三德

三障開通至極三道四側亦應開通至極答例何者業有三種謂漏業無漏業非漏非無漏業感於三報謂分段方便實報報由三種煩惱謂取相塵沙無明也又約三種報一一開三道約三種煩惱一一開四倒○第三釋止觀體相者既知大意豁達如前名字曠遠若向須識體理淵玄粗寄四意顯體一教相二眼智三境界四得失夫理藉教彰教法旣多故用相顯入理門不同故用眼智顯諦有權實故用境界顯人有差會故用得失顯法華疏用四一明實今以四科顯體可得相類教相顯者夫止觀名教通於凡聖

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

撰述

卷之三

九

不可尋通名求於別體故用相簡之若凡夫止善所治是止相行善所生是觀相又四禪四無量心是止相六行是觀相此等皆未免生死卽有漏爲相故大論云除摩黎山餘無出栴檀除三乘智慧餘無真智慧故非今所論也若二乘以九想十想八背捨九次第定多是事禪一往止相有作四諦慧是觀相此之止觀雖出生死而是拙度滅色入空此空亦得名止亦得名非止非不正而不得名觀何以故灰身滅智故不名觀但是析法無漏爲相非今所論也巧度止有三種一體真止二方便隨緣止三息二邊分別止

一體真止者諸法從緣生因緣空無生息心達本源故號爲沙門知因緣假合幻化性虛故名爲體攀緣妄想得空卽息空卽是真故言體真止二方便隨緣止者若三乘同以無言說道斷煩惱入真真則不異但言煩惱與習有盡不盡若二乘體真不須方便止菩薩入假正應用知空非空故言方便分別藥病故言隨緣心安俗諦故名爲止經言動止心常一亦得證此意也三息二邊分別止者生死流動涅槃保證皆是偏行偏用不會中道今知俗非俗邊寂然亦不得非俗空邊寂然名息二邊止此三止名雖未

見經論映望三觀隨義立名釋論云菩薩依隨經教爲作名字名爲法施立名無咎若能尋經得名卽懸合此義也詳此三止與前釋名名髮鬚同其相則異同者止息止似體真停止止似方便隨緣非止止似息二邊其相則別所謂三諦相也前三成次三後一具前三何以故如體真止時達因緣假名空無主流動惡息是名止息義停心在理正是達於因緣是停止止義此理卽真真卽本源本源不當止與不止是非止止此三義共成體真止相若方便止時照假自在散亂無知息是止息義停心假理如淨名入三昧觀

比丘根性分別藥病是停止義假理不動是非止止如是三義共成方便隨緣止相也息二邊時生死涅槃二相俱息是止息義入理般若名爲住緣心中道是停止義此實相理非止不止是不止止義如此三義共成息二邊止相故與前永異也亦非今所用也次明觀相觀有三從假入空名二諦觀從空入假名平等觀二觀爲方便道得入中道雙照二諦心心寂滅自然流入薩婆若海名中道第一義諦觀此名出瓔珞經所言二諦者觀假爲入空之詮空由詮會能所合論故言二諦觀又會空之日非但見空亦復識

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

假如雲除發障上顯下明由真假顯得是二諦觀今
由假會真何意非一諦觀又俗是所破真是所用若
從所破應言俗諦觀若從所用應言真諦觀破用合
論故言二諦觀又分別有三種一約教有隨情二諦
觀約行有隨情智二諦觀約證有隨智二諦觀初觀
之功雖未契真得有隨教隨行論二諦觀問初觀破
用合受名第二觀亦破用亦應言二諦耶答前已受
二諦名後雖破用更從勝者受平等名也問第三觀
亦破用何不更從勝受名答前兩觀有滯故更破更
用第三觀無滯但從用受名不得一例問前二觀俱

觀二諦亦應俱入二諦答初爲破病故觀假爲用真
故觀真是故俱觀一用一不用故不俱入問真及中
俱得稱諦界内外俗俗則非理云何稱諦答地持明
二法性一事法性性差別故二實法性性真實故卽
二諦之異名旣俱得稱法性何意不得俱稱諦問若
爾俱稱涅槃答經云貧人得寶乃至獮猴得酒又非
想定卽世俗涅槃卽其義也問若爾俱無漏耶答論
云世間正見出世正見問若爾俱無生耶答經云異
相互無問從假入空必須破假而入空耶答通途應
有四句不破入破不入不破不入乃至三十六

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

句如後說從空入假名平等觀者若是入空尚無空可有何假可入當知此觀爲化衆生知真非真方便出假故言從空分別藥病而無差謬故言入假平等者望前稱平等也前觀破假病不用假法但用真法破一不破一未爲平等後觀破空病還用假法破用既均異時相望故言平等也今當譬之如盲初得眼開見空見色雖見於色不能分別種種卉木根莖枝葉藥毒種類從假入空隨智之時亦見二諦而不能用假若人眼開後能見空見色卽識種類洞解因緣麤細藥食皆識皆用利益於他此譬從空入假亦真

真俗正用於假爲化衆生故名爲入假復言平等意如前說中道第一義觀者前觀假空是空生死後觀空空是空涅槃雙遮二邊是名二空觀爲方便道得會中道故言心心寂滅流入薩婆若海又初觀用空後觀用假是爲雙存方便入中道時能雙照二諦故經言心若在定能知世間生滅法相前之兩觀爲二種方便意在此也問大經云定多慧多俱不見佛性此義云何答次第三觀二乘及通菩薩有初觀分此屬定多慧少不見佛性別教菩薩有第二觀分此屬慧多定少亦不見佛性二觀爲方便得入第三觀則

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

見佛性問經言十住菩薩以慧眼故見不了了非全
不見初觀是慧眼位第二觀是法眼位云何而言兩
眼全不見耶答彼次第眼偏定偏慧佛之所呵不可
言其見也所言慧眼見者其名乃同實是圓教十住
之位三觀現前入三諦理名之爲住呼住爲慧眼耳
故法華云願得如世尊慧眼第一淨如斯慧眼分見
未了故言如夜見色空中鶩鴈非一乘慧眼得如此
名故法華中譬如有人穿鑿高原唯見乾土施功不
已轉見濕土遂漸至泥後則得水乾土譬初觀濕土
譬第二觀泥譬第三觀水譬圓頓觀又譬於教三藏

教不詮中道如乾土通教如濕土別教如泥圓教詮
中道如水二教之所不詮二行之所不到偏空慧眼
寧得見性若見性者無有是處此三觀與前三觀名
一往似同義相則異同者前是貫穿觀諸虛妄似從
假入空也前觀達觀達理和達事事和似入假平
等觀也前不觀觀似中道也其相異者前是一諦相
今是三諦相又前三觀通成後三後三具前三所以
者何如從假入空破四住磐石此豈非貫穿義所入
之空空卽是理智能顯理卽觀達義此之空理卽是
非觀觀義如此三義共成入空觀相也從空入假亦

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

具三義何以故識假名法破無知障卽是貫穿義照
假名理分別無謬卽觀達義假理常然卽不觀觀義
也此三義共成假觀相中道之觀亦具三義空於二
邊卽貫穿義正入中道卽觀達義中道法性卽不觀
觀義如此三義共成中道觀相此依摩訶衍明三止
三觀之相以義隨相條然各別若論三觀則有權實
淺深若論三智則有優劣前後若論三人則有諸位
大小此則次第分張非今所用也圓頓止觀相者以
止緣於諦則一諦而三諦以諦繫於止則一止而三
止譬如三相在一念心雖一念心而有三相止諦亦

如是所止之法雖一而三能止之心雖三而一也以
觀觀於境則一境而三境以境發於觀則一觀而三
觀如摩醯首羅面上三目雖是三目而是一面觀境
亦如是觀三卽一發一卽三不可思議不權不實不
優不劣不前不後不並不別不大不小故中論云因
緣所生法卽空卽假卽中又如金剛般若云如人有
目日光明照見種種色若眼獨見不應須日若無色
者雖有日眼亦無所見如是三法不異時不相離眼
喻於止日喻於觀色喻於境如是三法不前不後一
時論三三中論一亦復如是若見此意卽解圓頓教

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

止觀相也何但三一一三總前諸義皆在一心其相云何體無明顛倒卽是實相之真名體真止如此實相徧一切處隨緣歷境安心不動名隨緣方便止生死涅槃靜散休息名息一邊止體一切諸假悉皆是空空卽實相名入空觀達此空時觀冥中道能知世間生滅法相如實而見名入假觀如此空慧卽是中道無二無別名中道觀體真之時五住磐石砂礫一念休息名止息義心緣中道入實相慧名停止義實相之性卽非止非不止義又此一念能穿五住達於實相實相非觀亦非不觀如此等義但在一念心中

不動真際而有種種差別經言善能分別諸法相於第一義而不動雖多名字蓋乃般若之一法佛說種種名衆名皆圓諸義亦圓相待絕待對體不可思議不可思議故無有障礙無有障礙故具足無滅是圓頓教相顯止觀體也○二明眼智者體則非知非見非因非果說之已自難何況以示人雖叵知見由於眼智則可知見雖非因果由因果顯止觀爲因智眼爲果因是顯體之遠由果是顯體之近由其體冥妙不可分別寄於眼智令體可解今先明次第眼智者三止三觀爲因所得三智三眼爲果三止者若體真

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

止妄惑不生因止發定定生無漏慧眼開故見第一
 義真諦三昧成故止能成眼眼能見體得真體也若
 隨緣止冥真出假心安俗諦因此止故得陀羅尼陀
 羅尼分別藥病法眼豁開破障通無知常在三昧不
 以二相見諸佛土則俗諦三昧成是則止能發眼眼
 能得體得俗體也若息二邊止則生死涅槃空有雙
 寂因於此止發中道定佛眼豁開照無不徧中道三
 昧成故止能得眼眼能得體得中道體也三觀者若
 從假入空空慧相應卽能破見思惑成一切智智能
 得體得真體也若從空入假分別藥病種種法門卽

破無知成道種智智能得體得俗體也若雙遮二邊
 爲入中方便能破無明成一切種智智能得體得中
 道體也是則三止三觀共成三眼三智各得三體是
 故顯體而談眼智卽此意也問眼見智知知見異耶
 答此應四句分別知而非見見而非知亦知亦見不
 知不見凡夫不證故不見不聞故不知二乘人證故
 亦見聞故亦知支佛證故是見不聞故不知方便道
 人聞故是知未證故不見復次信行人因聞故有慧
 因慧故發無漏得一切智此智因聞故稱智知法行
 人思惟得定因定發無漏成慧眼此眼因禪故稱眼

9 10 1 2 3 4 5 6 7 8 9 30 1 2 3 4 5 6 7 8 9 30 1 2 3 4 5 6 7 8

見然知見同證真諦從所因處仍本受名故言知見也此就慧眼一切智作此分別餘二眼二智例爾若一心眼智則不如此若明不次第止觀眼智者如前所說止即是觀觀即是止無二無別得體近由亦如是眼即是智智即是眼眼故論見智故論知知即是見見即是知佛眼具五眼佛智具三智王三昧一切三昧悉入其中首楞嚴定攝一切定大品云欲得道慧道種慧一切智一切種智當學般若問釋論云三智在一心中云何言欲得道慧等當學般若答實爾三智在一心中爲向人說令易解故作如此說耳金

剛般若云如來有肉眼不答云有乃至如來有佛眼不答云有雖有五眼實不分張祇約一眼備有五用能照五境所以者何佛眼亦能照麤色如人所見亦過人所見名肉眼亦能照細色如天所見亦過天所見名天眼達麤細色空如二乘所見名慧眼達假名不謬如菩薩所見名法眼於諸法中皆見實相名佛眼當知佛眼圓照無遺故經云五眼具足成菩提永與三界作父母而獨稱佛眼者如衆流入海失本名字非無四用也佛智照空如二乘所見名一切智佛智照假如菩薩所見名道種智佛智照空假中皆見

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

實相名一切種智故言三智一心中得故知一心三
止所成三眼見不思議三諦此見從止得故受眼名
一心三觀所成三智知不思議三境此智從觀得故
受智名境之與諦左右異耳見之與知眼目殊稱不
應別說今將境來顯智令三觀易明用諦來自眼使
三止可解雖作三說實是不可思議一法耳用此一
法眼智得圓頓止觀體也如此解釋本於觀心實非
讀經安置次比爲避人嫌疑爲增長信幸與修多羅
合故引爲證耳○三明境界者若得能顯眼智中意
無俟所顯諦聽之說爲未解者更此一科夫信行尚

多聞因此分別以會圓妙法行宗深觀緣此思惟以
見正境耳就此爲二一明說境意二明諸境離合經
云爲諸衆生開佛知見若無中境智無所知眼無所
見當知應有佛眼境也經云世孰有真天眼者不以
二相見諸佛土若無俗境此眼不應見於佛土經云
天眼開闢慧眼見真故知應有慧眼境也此三諦理
不可思議無決定性實不可說若爲緣說不出三意
一隨情說卽隨他意語二隨情智說卽隨自他意語
三隨智說卽隨自意語云何隨情說三諦如盲不識
乳便問他言乳色何似他人答言色白如貝珠雪鶴

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

等雖聞此說亦不能了乳之真色是諸盲人各各作解競執貝株而起四諍凡情愚翳亦復如是不識三諦大悲方便而爲分別或約有門明三諦如盲聞貝或約空門明三諦如盲聞株或作空有門明三諦如盲聞雪或作非空非有門明三諦如盲聞鶴雖聞此說未卽諦理是諸凡夫終不能見常樂我淨真實之相雖未得見各執空有互相是非所以常途解二諦者二十三家家不同各各異見皆引經論莫知孰是若言併是理則無量若言併非悉有所據爲此義故執自非他雖飲甘露傷命早夭經稱文殊彌勒未

悟之時共諱二諦兩墮地獄今世凡情偏執一文鑑然固著雖謂爲能忍乖佛旨如是等人皆未識隨情三諦若識此意聞種種說卽知如來俯逐根情根情旣多說不一種此卽是隨他意而說三諦也隨情智說三諦者就情說二就智說一若爾不得一所論三此就凡情凡情悉是方便雖卽一而三但束爲二若就聖智聖智皆是實得雖卽一而三但束爲一情智相望故言三諦如相似位人六根淨時猶未發真見於中道雖觀三諦約位往明但破四住及塵沙惑旣證方便道但束爲一諦若入初住破無明見佛性雙

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

照二諦方稱爲智亦具三諦但末爲中道第一義諦情智合論即是隨自他意語也隨智說三諦者從初住去非但說中絕於視聽真俗亦然三諦玄微唯智所照不可示不可思聞者驚怪非內非外非難非易非相非非相非是世法無有相貌百非洞遣四句皆云唯佛與佛乃能究盡言語道斷心行處滅不可以凡情圖想若一若三皆絕情望尚非二乘所測何況凡夫如乳真色眼開乃見徒費言語盲終不識如是說者名爲隨智說三諦相也即是隨自意語今更引經中所明二諦文顯成三諦之說若言凡夫人卽能

體達因緣生於觀解豈非隨情說俗體因緣卽空豈非隨情說真若如此者即是隨情說二諦也若言凡夫心所見名爲俗諦聖人心所見名爲真諦如此說者豈非隨情智說二諦也若言凡夫行世間不知世間相凡夫尚不知世間之俗那得知真故知二諦皆非凡情所識如此說者豈非隨智說二諦二諦既有三番說三諦例此可解疑者若言佛常依二諦說法故有三番二諦意今亦例此佛常好中道降胎出生出家成道入滅皆在中夜一色一香無非中道若說中道豈不三意赴緣耶又一一說各具四悉檀意隨

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

情中四意者夫諦理不可說說必寄言言必契情情必欣悅或聞真歡喜或聞俗歡喜或聞中歡喜此卽是隨情中用世界悉檀意也夫衆生便宜不同或聞說無戒慧增長或聞說有戒慧增長或聞說中戒慧增長此卽隨情中用爲人悉檀意也夫行者破惡不同或聞有法能破睡眠覺觀等或聞無法能破睡散等或聞中法能破睡散等此卽隨情中用對治悉檀意也夫衆生入悟不同或聞無開解或聞有超悟或聞中發徹乃至觀心亦爾或說有觀悅如雲影或作無觀泯失身心或作中觀神智明白如是等種種不

同應在一不在二應在一不在一故云佛說生法於無生法得度佛說無生法於生法得度此卽是用第一義悉檀意也故法華云佛知衆生種種欲種種行種種性種種憶想卽此四意何故爾種種欲是隨世界種種性是生善種種行是對治種種憶想是第一義何故性屬生善行屬對治破惡耶若通論性善有冥有顯行惡亦有冥有顯今從義便善是冥伏惡是彰露如佛未出時三乘善根冥伏不現故言善性冥也若聞三諦此善發生故知種種性應屬生善可對爲人悉檀也又佛未出時諸衆生惡行彰顯邪非僻

倒過失現前佛爲破此惡故說於三諦故知種種行
屬破惡卽對治悉檀也種種憶想是第一義者想是
慧數僻故成心倒見倒等若遇知識正此想慧卽成
三不倒佛欲正其此慧故說三諦卽第一義也隨情
說三諦旣具四意隨情智隨智說三諦例此可解是
則三四十二種說三諦不同豈可以凡情局聖謂唯
一種執諍自毀耶若知聖說無崖終不是此非彼起
增上慢高舉稜層如有智盲人莫諍乳色勤行方便
慚愧有羞以三止證三眼見三法獲三智知三諦見
中分明雙照曉了如雲除發障上顯下明爾時乃可

諦審是非決定師子吼也私謂隨情是併與隨情智
是半與半奪隨智是併奪何者如聖語凡云汝今心
想卽是俗能體達俗虛卽是真豈非併與相汝今所
知百千推畫皆是俗唯聖所知乃是真豈非半與半
奪相夫二諦者凡人併不識上聖獨能知此豈非併
奪此釋易解故錄之二明境智離合者先境次智衆
經說諦或四三二二離合不同今當通說三藏是方
便之教但明二諦菩薩初心中心緣真伏於四住令
煩惱脂消三阿僧祇修六度行使功德身肥百劫種
相好獲五神通得法眼照俗諦分別根性調熟衆生

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

而作佛事後心坐道場三十四心斷見思惑盡此三十四心入忍八智九無礙九解脫合爲三十四心也又經言一念六百生滅成論師云一念六十刹那祇是一念從假入空得慧眼照真諦而得成佛前已照俗次復照真二諦雙明與弟子異菩薩但照俗不照真二乘但照真不照俗佛能兼俱更加中道第一義諦三藏二諦已是方便於二諦上更加中道方便之上更復方便照見此諦更加佛眼知此諦故更加一切種智離則有二合則有三是爲三藏法中二諦三諦離合之相也次三乘人同以無言說道斷煩惱論

諦離合者俗諦則同真諦則異大論云空有二種一但空二不但空大經云二乘之人但見於空不見不空智者非但見空能見不空不空卽大涅槃二乘但空智如螢火菩薩之人智慧如日旣空異智別則有兩諦之殊而今合爲一真諦二乘體假入真祇入但空不能從但空入假無化他之用菩薩體假入但真能從但空入假化度衆生淨佛國土上根菩薩體假入真前入但空次入不但空則破無明見佛性與前真永別豈可同爲一真諦耶昔莊嚴家云佛果出二諦外得此片意而作義不成不知佛智別照何境別

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

斷何惑若得今意出外義則成開善家云佛果不出二諦外不能動異二乘作義復不成若得此意不出義亦成古來名此爲風流二諦意在此但空不但空合時祇是一真諦離時成兩真諦與三藏家異彼三藏第三諦但有中道名無別體眼無別見智無別知今則不爾第三諦亦名真諦亦名中道第一義諦有別體別見別知是爲通教二諦三諦離合之相也次別教明二諦與前求異前之真俗合爲別家之俗俗者是世界隔別俗有真無凡夫爲俗諦所攝二乘爲真諦所攝既有無之異故稱爲俗勝鬘名二乘作空

亂意衆生大經云我與彌勒共論世諦五百聲聞謂說真諦若論二諦俗諦不開若作三諦開有爲俗開無爲真對不但空爲第一義諦是爲別教離合之相也

摩訶止觀卷第三

上

校訛

第九紙五行

止南

第十三紙十三行

偏慧南

第

一

八紙十四行

眼臍殊稱疑

第二十二紙十二行

偏慧

第

二

作二十四紙十八行

求異疑

一

音釋

支那

廣雅卷第

二十一

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8

撰述

原詩十卷目

梗概

梗古杏切概居代
切梗概大率也

鑽

厥縛切
大鉏也

斲

竹角切
刷也

卉

貴

總名也

學讀注釋卷三

學然後知不足，教然後知困。知不足，然後能自反也；知困，然後能自強也。故曰：教学相長也。其此之謂乎？

オ、ナ、一

9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9